



明史稿

傳百四十九之五十二



內閣文庫	
函	冊
三二	八三五
架	冊
號	類

內閣文庫	
番號	漢 8835
冊數	78 (65)
函號	281 39



史藁

列傳第一百四十九

光祿大夫 經筵講官明史總裁戶部尚書加七級王鴻緒奉

敕編撰

史可法

衛胤文 剛

任民育

高弘圖

姜曰廣

周 鍾

史可法字憲之順天大興人世錦衣百戶祖應元舉於鄉官

黃平知州有惠政語其子從質曰我家必昌從質妻尹氏有

娠夢文天祥入其舍生可法事親以孝聞舉崇禎元年進士

授西安府推官能聲大著稍遷戶部主事歷員外郎郎中八

年遷右參議分守池州太平其秋總理侍郎盧象昇大舉討

賊改可法副使分巡安慶池州監江北諸軍未幾黃梅賊掠



宿松潛山太湖將犯安慶知可法有備遁去可法追至潛山
天堂寨搜賊賊多死明年正月祖寬大破賊滁州賊盡走河
南江北稍靖至十二月賊馬守應合羅汝才李萬慶自鄖陽
東下江北震動可法馳駐太湖城外當其衝賊於十年正月
從間道突安慶石碑鎮參將潘可大來援賊移桐城可大赴
救賊北走爲廬鳳軍所阨復回桐城可法與可大勦捕斬獲
多賊走廬江去已犯潛山可法與左良玉敗之楓香驛賊乃
竄潛山太湖山中三月可大及副將程龍敗沒於宿松賊分
其黨搖天動別爲一營而合八營十餘萬衆分屯桐城之練
潭石井鋪陶冲驛連營六十里可法備嚴不敢犯閏四月總
兵牟文綬劉良佐以兵至戰於挂車河賊少退七月廷議安

慶急宜設重臣鎮之卽擢可法右僉都御史巡撫安慶廬州
太平池州四府及河南之光州光山固始羅田湖廣之蘄州
廣濟黃梅江西之德化湖口諸縣提督軍務設額兵萬人賊
已東陷和州含山定遠六合犯天長盱眙趨河南安廬間得
暫息其冬賊復犯潛山爲部將汪雲鳳所敗老回回掠舒城
廬江亦爲京軍所破乃遁入大山時出劫掠可法東西馳禦
而監軍僉事湯開遠善擊賊賊憚此二人稍稍避其鋒十一
年夏兵部尚書楊嗣昌以平賊踰期普議文武諸臣罪可法
亦戴罪立功可法短小精悍面黑日爍爍有光持身廉接士
信雜處行伍間與下同勞苦軍行士不飽不先食未授衣不
先御以故得士死力連敗賊英山六合順天王遂乞降當是

時總理侍郎熊文燦大布招降令賊多降未降者亦觀望且勢孤以故警漸稀而可法於十二年夏丁外艱去十四年起戶部右侍郎兼右僉都御史代朱大典總督漕運巡撫鳳陽淮安揚州漕輓歲愆期缺額幾百萬可法劾罷督糧道三人增設漕儲道一人大濬南河愼簡運官盡祛諸蠹弊鳳陽總督高斗光討賊無功有議用可法者御史劉逵言可法理漕有效不宜易乃已廷議將易兵部尚書陳新甲尚書劉遵憲言官章正宸等十一人並舉可法章下吏部尚書李日宣等言可法文武才而漕事方亟宜俟報竣召用乃復畱十六年七月拜南京兵部尚書參贊機務武備久弛可法奏行更新八事十七年四月朔知賊犯宮闕大會羣寮誓師勤王檄諸

鎮兵並進而身渡江抵浦口乃聞北都陷南京諸大臣議立君張愼言呂大器姜曰廣等言福王有七不可惟潞王賢明當立移牒可法鳳陽總督馬士英以福王倫序當立書咨可法可法卽以七不可之說告而身還南京士英已與黃得功劉良佐劉澤清高傑發兵送福王至儀真可法乃與諸大臣具啓奉迎事詳福王傳五月朔王謁孝陵奉先殿畢出居內守備府羣臣入朝議戰守可法言王當素服郊次發師北征示天下以必報讐之義王唯唯明日再朝出議監國事張愼言曰國虛無人可遂卽大位可法曰太子存亡未卜倘南來若何誠意伯劉孔昭曰今日既定誰敢復更可法曰稍緩數日亦無害乃退初三日王監國廷推閣臣衆舉可法及高弘


圖姜曰廣孔昭攘臂欲並列可法曰本朝無勛臣入閣例孔昭勃然曰卽我不可馬士英何不可乃并推士英又議起廢共推鄭三俊劉宗周徐石麒孔昭特舉阮大鍼可法曰此先帝欽定逆案毋庸再言乃已越二日拜可法禮部尚書兼東閣大學士與士英弘圖並命可法仍掌兵部事士英仍督師鳳陽乃定京營制如北都故事侍衛及錦衣衛諸軍悉入伍操練錦衣東西兩司房及南北兩鎮撫司官不備設以杜告密安人心當是時士英旦夕冀相及命下大怒卽以可法七不可書密奏於王而擁兵請入覲拜疏卽行可法以士英入勢不兩立十二日請督師淮揚十五日王卽位明日可法陞辭加太子太保改兵部尚書武英殿大學士百官郊餞可

法疏辭士英以是日入直可法與士英弘圖曰廣議分廬鳳淮揚爲四鎮屏蔽江南卽以得功良佐澤清傑爲之俄封得功侯良佐等伯諸鎮各擁重兵朝廷遂不能制可法啓行王令遣使訪大行帝后梓宮及太子二王所在令祭告泗鳳二陵可法去慎言舉吳姓孔昭譁殿上可法聞之上疏曰先帝用人無成心袁繼咸及士英皆起戍籍姓奉命南征因候唐通兵不至稽遲蒙譴其過可原北都之變文臣固多悞國武臣豈皆盡忠若各執成心日尋水火朋黨一分禍安所底士英孔昭輩卒持性不用可法祭二陵畢上疏曰陛下踐阼之始祇謁孝陵哭泣盡哀道路感動若躬謁二陵親見鳳泗境中蒿萊滿目雞犬無聲當益悲憤願慎終如始處深宮廣廈

則思東北諸陵魂魄之未安享玉食大庖則思東北諸陵麥
 飯之無展膺圖受錄則念先帝之集木馭朽何以忽遘危亡
 早朝晏罷則念先帝之克儉克勤何以卒隳大業戰兢惕厲
 無時怠荒則二祖列宗必默佑中興若晏處東南不思遠略
 賢奸無辨威斷不靈老成投簪豪傑裹足祖宗怨痛天命潛
 移東南一隅未可保也王嘉荅之得功澤清傑皆欲駐揚州
 以兵爭傑先至大淫掠城外死者無算城中人恟懼登陴固
 守傑攻之浹月澤清又大掠淮上良佐以臨淮人不納其兵
 亦攻闕之朝命可法往解得功良佐澤清皆聽命乃詣傑傑
 朝可法帳中辭色俱變而可法坦懷待之偏裨皆接以溫語
 一軍遂安然自是易可法用已甲士防衛所移文檄必取視

乃行可法為具疏以瓜洲城屯其眾可法遂開府揚州六月
 李自成為

大清兵所敗棄京師西走青州諸郡縣並殺賊偽官據城自
 保未知南都建國事可法請速頒監國登極二詔慰山東河
 北軍民心從之可法乃開禮賢館招四方才智下僚有才被
 棄者亦悉舉任用之以監紀推官應廷吉領其事盧渭等皆
 與幕府稱得人七月大學士弘圖乞休請召可法報聞是月
 大清睿親王遣官齎書致可法曰予向在瀋陽即知燕山物
 望咸推司馬及入關破賊得與都人士相接見識介弟於清
 班曾託其手勒平安權致衷緒未審以何時得達比聞道路
 紛紛多謂金陵有自立者夫君父之讐不共戴天春秋之義



有賊不討則故君不得書葬新君不得書即位所以防亂臣賊子法至嚴也闖賊李自成稱兵犯闕手毒君親中國臣民不聞加遺一矢平西王吳三桂介在東陲獨效包胥之哭朝廷感其忠義念累世之宿好棄近日之小嫌爰整貔貅驅除狗鼠入京之日首崇懷宗帝后諡號卜葬山陵悉如典禮親郡王將軍以下一仍故封不加改削勲戚文武諸臣咸在朝列恩禮有加耕市不驚秋毫無擾方擬秋高氣爽遣將西征傳檄江南聯兵河朔陳師鞠旅戮力同心報乃君國之讐彰我 朝廷之德豈意南州諸君子苟安旦夕弗審事機聊慕虛名頓忘實害予甚惑之國家之撫定燕都乃得之於闖賊非取之於明朝也賊毀明朝之廟主辱及先人我國家不

憚征繕之勞悉索敝賦代爲雪恥孝子仁人當如何感恩圖報茲乃乘逆寇稽誅王師暫息遂欲雄據江南坐享漁人之利揆諸情理豈可謂平將以爲天塹不能飛渡投鞭不足斷流耶夫闖賊但爲明朝祟耳未嘗得罪於我國家也徒以薄海同讐特伸大義今若擁號稱尊便是天有二日儼爲勅敵予將簡西行之銳轉膾東征且擬釋彼重誅命爲前導夫以中華全力受制潢池而欲以江左一隅兼支大國勝負之數無待著龜矣予聞君子之愛人也以德細人則以姑息諸君子果識時知命篤念故主厚愛賢王宜勸令削號歸藩永綏福祿 朝廷當待以虞賓統承禮物帶礪山河位在諸王侯上庶不負 朝廷伸義討賊興滅繼絕之初心至南州羣彥

翩然來儀則爾公爾侯列爵分土有平西之典例在惟執事
實圖利之輓近士大夫好高樹名義而不顧國家之急每有
大事輒同築舍者宋人議論未定兵已渡河可爲殷鑒先生
領袖名流主持至計必能深惟終始寧忍隨俗浮沈取舍從
違應早審定兵行在即可西可東南國安危在此一舉願諸
君同以討賊爲心毋貪一時瞬息之榮而重故國無窮之禍
爲亂臣賊子所笑予實有厚望焉記有之惟善人能受盡言
敬布腹心佇聞明教江天在望延跂爲勞書不宣意可法旋
遣人報書語多不屈事見 國史八月可法出巡淮安閱澤
清士馬復返揚州屢疏請餉爲進取資士英斬不發可法復
疏趣之因言近來人才日耗仕路日淆由名心勝而實業不

修議論多而成功絕少遇清卿臺省則曰謀猷經濟非其人
不可遇錢穀之任則曰此危地何爲困我輩此推彼卸姑付
庸人倏用倏更有同兒戲卽偶出特簡亦必百計求全非託
病則棄官曾無爲國家實心任事者以致敗壞至此今事勢
更非昔比必專主討賊復讐舍籌兵籌餉無議論舍治兵治
餉無人才有摭拾浮談巧營華要者罰無赦停不急官罷不
急務俾大小臣工并力恢復則中興之業可成王亦優獎之
而不能行初可法處傑跋扈故駐得功儀真以防之至九月
朔得功傑構兵曲在傑賴可法調劑事始解遂以是月巡儀
真閱得功士馬銳意進兵河南朝諭北使方行兵不宜繼進
遂止時北都降賊諸臣以賊敗南還可法言諸臣原籍北土

者宜令赴吏兵二部錄用否則絕其南歸之心又言北都之變凡屬臣子皆有罪若在北者始應從死豈在南者獨非人臣卽臣可法謬典南樞臣士英叨任鳳督未能悉東南甲疾趨北援鎮臣澤清傑以兵力不支折而南走是首應重論者臣等罪也乃因聖明繼統鈇鉞未加且恩榮疊被獨於在北諸臣毛舉而槩繩之豈散秩閒曹責反重於南樞鳳督哉宜摘罪狀顯著者重懲示儆若僞命未污身被刑辱皆當置不問其逃避北方徘徊後至者許戴罪討賊赴臣軍前酌用廷議並從之傑初居揚州桀驁甚可法待以至誠開導君臣恩義傑大感悟一聽指揮會自成敗還陝西可法將北行傑卽於十月中帥師進可法亦赴清江浦遣官屯田開封爲經畧

中原計當是時諸鎮各分汛地擇便利者自王家營而北至宿遷最衝要諸鎮不敢任可法自任之令幕下文武築壘緣河南岸十一月四日舟次鶴鎮諜報我

大清兵入宿遷命總兵劉肇基往援

大清兵引還無何圍邳州肇基復援之相持半月而解時自成遁關中猶未滅可法請頒討賊詔書言自三月以來大讐在目一矢未加昔晉之東也其君臣日圖中原而僅保江左宋之南也其君臣盡力楚蜀而僅保臨安蓋偏安者恢復之退步未有志在偏安而遽能自立者也大變之初黔黎泣紳士悲哀猶有朝氣今則兵驕餉絀文恬武嬉頓成暮氣矣河上之防百未經理人心不肅威令不行復讐之師不聞及

關陝討賊之詔不聞達燕齊君父之讐置諸膜外夫我卽卑
宮非食嘗膽臥薪聚才智精神枕戈待旦合方州物力破釜
沈舟尚虞無救以臣觀廟堂作用百執事經營殊有未盡然
者夫將所以能克敵者氣也君所以能禦將者志也廟堂志
不奮則行間氣不鼓夏少康不忘出寶之辱漢光武不忘焚
薪之時臣願皇上爲少康光武不願左右在位僅以晉元宋
高之說進也憶臣等初迎聖駕時陛下言及先帝則泣下沾
襟恭謁孝陵則淚痕滿袖皇天后土實式鑒臨曾幾何時頓
忘斯志先皇帝死於賊恭皇帝亦死於賊此千古未有之痛
國家變出非常在北諸臣死節者無多在南諸臣討賊者復
少此千古未有之恥夫庶民之家父兄被殺尚思穴胸斷脛

得而甘心況在朝廷顧可漠置臣恐恢復無期卽偏安亦未
可保也今宜速發討賊之詔責臣與諸鎮悉簡精銳直指秦
關懸上爵以待有功假便宜而責成效絲綸之布痛切淋漓
庶海內忠臣義士聞而感憤且國家遭大變陛下嗣登大寶
原與先朝不同諸臣但有罪之當誅曾無功之足錄臣於登
極詔藁特將加恩一款刪除不意後來仍復開載致貽笑天
下今恩外加恩紛紛未已武臣腰玉名器濫觴自後尤宜慎
重專待有功庶猛將武夫有所激厲至兵行討賊最苦無糧
搜括不可行勸輸亦難繼請將不急之工程可已之繁費一
切報罷朝夕之燕衍左右之進獻一切謝絕卽事闕典禮萬
不容已者亦槩從節省蓋賊一日未滅卽有深宮曲房豈能

安處卽有錦衣玉食豈能安享必刻刻在雪恥報讐振舉朝精神萃萬方物力盡并於選將練兵一事庶人心可鼓天意可回疏出朝野傳誦及

大清兵下邳宿可法飛章以報而士英謂可法徒欲敘防河將士功卒不省方諸鎮之初設也可法欲用其師以北及位秩旣崇咸無進師意且數相攻可法深悔之語其客言斬已及弘圖士英曰廣四人頭爲任事不忠之戒上疏言先帝待諸鎮甚厚陛下封諸鎮甚隆乃不思報國自弄干戈舍父母之讐尋同室之鬪今和議不成惟有言戰戰非諸鎮事而誰事乎可法每繕疏循環諷誦聲淚俱下旁觀者無不感泣士英第取優旨報之而已

順治二年

大軍日南下正月河上告警可法求援益切詔良佐得功率師阨潁壽傑進兵歸徐傑至睢州爲許定國所誘殺部下兵將大亂互爲雄長睢州旁近二百里殺戮無遺朝議遣可法撫之而將其軍可法馳至徐州以總兵李本身傑甥用爲提督代統其兵諸將各分地又立傑子元爵爲世子請恤於朝軍乃定侍講衛胤文陷賊南旋傑以其同鄉請爲已監軍命以原官兼兵科給事中赴傑軍傑已死可法欲諷諭傑軍請擢胤文兵部右侍郎總督各營將士經略開歸而已畱駐徐州得功良佐澤清聞本身將傑軍連章劾可法二月可法將還揚州未至得功來襲欲代統傑軍城中大懼可法急遣同知曲從直等解之乃引去可法尋至揚州時

大兵已取山東河南北將逼淮南客請移泗州防護祖陵可法然之遂以四月朔命幕僚載輜重先赴會左良玉稱兵將犯關王手書召可法入援遂即日發兵渡江抵燕子磯良玉已爲得功所敗乃令速還防

大清兵南下抵天長檄召諸將救盱眙俄報盱眙已降

大清泗州援將侯方巖全軍敗沒可法奔還揚州十八日

大清兵逼揚州城下招諭可法及胤文四總兵二道官等不從俄總兵李棲鳳監軍副使高岐鳳拔營出降城中勢益孤諸文武分陴拒守越二日

大清兵用巨砲擊城西北隅毀二十五日城遂破可法自刎不死一裨將擁出小東門被執可法大呼曰我史督師也可

速殺我勸之降不從遂被殺胤文赴水死揚州知府任民育同知曲從直王纘爵江都知縣周志畏羅伏龍兩淮鹽運使楊振熙監餉知縣吳道正江都縣丞王志端幕客盧渭等皆死劉肇基城破率其將佐巷戰全軍俱沒自有傳可法初以定策功加少保兼太子太保以太后至加少傅兼太子太傅敘江北戰功加少師兼太子太師擒劇盜程繼孔功加太傅皆力辭不允後以宮殿成加太師力辭乃允可法既死其後四方弄兵者多假其名號以行故時謂可法不死云胤文字祥趾韓城人崇禎辛未進士授庶吉士歷編修司業中允諭德告歸十四年李自成入關全省瓦解胤文方在里星夜赴都痛哭陳勦賊計言西土之危將延社稷并請召四大鎮翼

衛王室次第上五疏且捐資犒軍帝以其剴切召見褒勞京師陷匿民間賊搜得之考訊備至乘間南奔可法疏薦監傑軍傑死以兵部右侍郎總督傑所部兵經略開歸軍務兼徐揚巡撫至是以節終民育字時澤濟寧人天啓中舉於鄉善騎射常捍鄉人患真定巡撫徐標請於朝用爲標下贊畫經理屯事真定失南還福王時授亳州知州以才擢揚州知府可法倚之城被圍民育分門拒守及城破急還署緋衣端坐堂上

大兵至欲擁之去不從遂見殺闔家男婦盡赴井死從直遼東人與其子守東門城破俱死纘爵鄞人工部尚書佐孫志畏亦鄞人起家進士年少氣高與高傑將士不協數遭窘辱

求解職會伏龍至可法卽命代之伏龍新喻人故梓潼知縣也受代甫三日振熙臨海人道正餘姚人志端孝豐人渭字渭生長洲人居禮賢館久可法試以策擢特等以渭方歲貢當得官不受職而擬授崑山歸昭等二十餘人爲通判推官知縣甫二旬城陷渭監守鈔關投河死昭分守西門死從死者又十七人而揚州諸生亦多殉義者高孝纘字申伯城破書衣衿曰首陽志睢陽氣不二其心古今一致入學宮自經先聖座前王士琇設莊烈帝位泣拜與其弟並縊死何剛字懋人上海人崇禎三年舉於鄉見海內大亂日講求濟世事十七年正月疏陳選練滅賊諸策帝褒納之又言國家設制科立資格以約束天下豪傑此所以弭亂非所以戡亂也今

日救生民匡君國莫急於治兵願陛下親簡強壯英敏之士命知兵大臣教習之日講鞬鈴練筋骨拓膽智陛下時召試俟實學既成特優其秩寄以兵柄必能建奇功當一面臣讀戚繼光書數言義烏東陽兵可用誠得召募數千加之訓練準繼光遺法分布河南郡縣大寇可平帝壯其言卽擢剛職方主事募兵金華剛甫出都都城卽陷馳還其鄉先是賊逼京師剛友陳子龍夏允彝將聯海舟達天津爲緩急用募卒二千人至是令剛統率及子龍入爲兵科言防江莫如水師更乞廣行召募委剛訓練從之尋進本司員外郎以其兵隸可法可法大喜剛亦以遇知己誓同生死踰月而揚州被圍佐可法拒守城破投井死時有吳爾壩者崇德人舉崇禎十

六年進士授庶吉士京師陷降於賊賊敗南還謁可法請從軍贖罪可法遂畱參軍事其父之屏方督學福建爾壩斷一指昇故人祝淵曰君歸語我父母悉出私財畀我餉軍我他日不歸以指葬可也尋從高傑北征至睢州傑被難爾壩流寓祥符遇一婦人自言福王妃爾壩因守臣附疏以進詔斥其妄言逮之可法爲救免後守揚州新城亦投井死

高弘圖字研文膠州人萬曆三十八年進士授中書舍人擢御史天啓元年陳時政八患尋與同官張慎言交章請寬賈繼春忤旨下廷議將重譴尚書周嘉謨大學士劉一燝等力救乃停俸二歲巡按陝西捕誅奸民煽亂者澄清吏治風裁肅然初弘圖陳時政請速用鄒元標趙南星及是題薦屬吏

爲南星所糾心甚銜之代還移疾去五年魏忠賢黨以弘圖素銜南星召起故官六月入都則楊漣左光斗魏大中等已下詔獄鍛鍊嚴酷弘圖上疏力詆南星而中言國是已明雷霆不宜頻擊詔獄諸臣生殺宜聽司敗法似稍謂忠賢過當者疏中又引漢元帝乘船事忠賢方導帝游幸怒矯旨切責之後諫帝毋出蹕東郊忠賢責以抗沮又極論前陝西巡撫喬應甲罪且嘗微刺崔呈秀以故擬順天巡按不用弘圖乞歸遂令閒住莊烈帝卽位起故官劾罪田詔劉志選梁夢環未幾擢太僕少卿復移疾去崇禎三年春召拜左僉都御史進左副都御史五年二月遷工部右侍郎方入署中總理戶工二部中官張彝憲來會弘圖恥之不與共坐上言曰臣部

公座尚書居中侍郎旁列忽益以內臣臣若侍坐內臣紊祖制故僅以後堂成賓主禮今總理別建公署宜於公署設座見朝廷特遣恩榮臣部公座仍還臣等帝令如舊行事關錢穀則內臣赴部同核弘圖乃七疏乞休帝怒明年三月削籍歸聲望由此重家居十年不起言者交薦十六年春召拜南京兵部右侍郎就遷戶部尚書明年三月京師陷五月福王監國於南都改弘圖禮部尚書兼東閣大學士疏陳新政八事一宣義問請聲逆賊之罪鼓發忠義一勤聖學請不俟釋服日御講筵一設記注請召詞臣入侍日記言動一睦親藩請如先朝踐極故事遣官齋壘書慰問一議廟祀請權附列聖神主於奉先殿仍於孝陵側望祀列聖山陵一嚴章奏請

禁奸宄小人借端妄言脫罪僥倖一收人心請蠲江北河南山東田租母使賊徒藉口一擇詔使請遣官招諭朝鮮示牽制之勢並褒納焉馬士英疏薦阮大鍼弘圖及姜曰廣力持不肯擬旨士英曰我自任之乃命假冠帶來京陛見及大鍼入見歷陳冤狀以弘圖不附東林引爲證弘圖則力言逆案不可翻大鍼與士英並怒弘圖遂乞罷王慰畱之士英旣以薦大鍼叢物議意頗折一日閣中以詞臣缺人言及故庶吉士張溥士英曰我故人也死爵而哭之曰廣笑曰公哭東林賢者亦東林耶士英曰我非畔東林者東林拒我耳弘圖因從臾之士英意解而劉宗周劾疏自外至大鍼宣言曰廣實使之於是士英怒不可止薦張捷謝陞疏出朝端益水火矣

內札用戶部侍郎張有譽爲尚書弘圖封還具奏力諫卒以廷推簡用中官議設東廠弘圖爭不得遂乞休且請召還史可法皆不許已加太子少師改戶部尚書文淵閣弘圖入閣先於士英士英加太子太師遂位弘圖上爲首輔尋以太后至進太子太保當燕京陷沒中原盜賊充斥惟江左粗安文武備位然將帥雖有四鎮合計提兵不過十數萬且將各一心軍非宿練各擇善地競相私鬪可法不能制左良玉在莊烈帝時顯然跋扈至是益輕中朝陰圖不軌而士英握柄於內東林黨人以不遂立潞王故益肆攻擊并及武臣之黨於士英者於是文武互爲爭勝愈不可解置封疆於不問矣及王師日南下陪京不守潞王亦降於杭州推其原馬阮爲亡

國之奸而弘圖呂大器錢謙益等實生厲階遂至東南半壁
一旦淪喪云弘圖謝政無家可歸乃流寓會稽野寺中以卒
姜曰廣字居之新建人萬曆末舉進士授庶吉士進編修天
啓六年偕給事中王夢尹使朝鮮還陳海外情形有裨軍國
者八事明年四月魏忠賢黨以曰廣為東林因推陞削其籍
崇禎初起右中允九年積官至吏部右侍郎尋坐事左遷南
京太常卿遂引疾去十五年用薦起詹事掌南京翰林院北
都變聞福王立廷推閣臣命用史可法高弘圖馬士英以曰
廣曾有異議不用及再推詞臣以王鐸陳子壯黃道周名上
而曰廣居首乃改禮部尚書兼東閣大學士與鐸並命鐸里
居未至可法督師揚州曰廣與弘圖協心輔政而士英挾擁

戴功內結勛臣朱國弼劉孔昭趙之龍外連諸鎮劉澤清劉
良佐等謀擅朝權深忌二人及沮阮大鍼進用益為所疾曰
廣遂抗疏乞休言近者逆案忽翻使先帝十七年定力頓付
逝波夫祖宗會推之典萬世無弊頃者翻案之舉導內傳而
廢會推踐斜封墨敕口救處分覆轍臣觀先帝善政雖多而
以堅持逆案為盛美先帝害政間有而以頻出口宣為亂階
用閣臣以內傳用部臣勲臣以內傳選大將選言官以內傳
而所得閣臣則淫貪巧猾之周延儒逢君浚民奸險刻毒之
溫體仁楊嗣昌偷生從賊之魏藻德所得部臣則陰邪貪狡
之王永光陳新甲所得勛臣則力阻南遷盡撤守禦狂穉之
李國禎所得大將則統袴支離之王樸倪寵輩所得言官則

貪橫無賴之史莖陳啓新凡此皆力排衆議簡自中旨者後效亦可睹矣今又創一祕方但求面對立談取官同登場之戲劇下殿得意類羸勝之販夫小人何知求進而已陰奪會推之柄陽避中旨之名此豈可爲訓哉天威在上密勿深嚴臣安得事事爭但願深宮有暇時取大學衍義資治通鑑視之周宣漢光何以復還前烈晉元宋高何以終徂偏安武侯之出師何惓惓於親君子遠小人李綱之禦敵何切切以信君子勿比小人進必能發聖心之天明破邪說於先覺然後國恥可得雪中興可得期也臣待罪綸扉朝廷未肅風俗未淳兵民之危疑未解江河之備禦全疎半壁東南有同幕雀媿死無地終夜拊膺而責臣者叢至矣苟好盡言終蹈不測

之禍聊取充位又來鮮恥之譏鬱鬱居此臣今誠病但恐求病而死亦不可得耳疏入慰留之士英大鍼等不悅國弼孔昭遂以誹謗先帝誣讖忠臣李國禎爲辭交章攻之劉澤清初附東林擁立議起亦主潞王至是入朝欲自解免力詆東林誑已且曰中興所恃在政府今用輔臣須令大帥僉議退謁內閣曰廣微以聲氣動之澤清作色曰我在先朝爲東林所賣被彈無完膚今不盡殺此輩不止曰廣默然越數日澤清疏劾呂大器雷縉祚而薦張捷鄒之麟張孫振劉光斗等又陳保邦八事首規政府末刺朋黨語絕恣肆時議設廠衛緝事官蘇松巡撫祁彪佳力諫曰廣爲擬命旨不從疏爭之甚力乃命五城御史察訪七月澤清請免故輔周延儒賊曰

廣惡其漸干朝政暫停不下欲待言路發之然後下澤清疏
既久無言者乃下部議竟不許曰廣嘗與士英交詆王前曰
廣言上以親以序自應立汝何功士英厲聲曰臣無功爾輩
欲立潞藩故成臣功耳爭辨久之宗室朱統鑣疏言從賊之
輩皆曰廣私人方迎立時曰廣又懷異志不可爲宰相疏不
由通政司爲禮科所駁通政司劉士禎亦劾其違制俱不問
八月澤清假諸鎮公疏力攻劉宗周并及曰廣以三案舊事
及迎立異議爲言請執下法司正謀危君父之罪曰廣疏辨
乞去亦不問頃之統鑣復劾曰廣五大罪一引用東林死黨
鄭三俊吳甡房可壯孫晉把持朝政以劉士禎爲通政沮遏
章奏以王重爲文選廣植私人二篡逆令楊廷麟出劇盜南

康獄交聯江河大俠與水陸奸弁日窺南都聲息非謀劫送
則謀別戴三庇從賊諸臣四納賄五奸媳請并士禎重廷麟
及劉宗周陳必謙周鑣雷縉祚俱置之理疏入必謙鑣並被
逮給事中熊汝霖總督袁繼咸不平抗疏論列不報曰廣既
連被誣讎屢疏乞休至九月得請及入辭士英暨諸大臣俱
在列曰廣言微臣觸忤權奸自分萬死上恩寬大猶許歸田
但臣歸後當還以國事爲重王曰先生言是士英勃然曰我
權奸汝且老而賊也因叩頭言臣從滿朝異議中擁戴陛下
願以犬馬餘生歸老貴陽避賢路如陛下畱臣臣亦但多一
死曰廣叱之曰擁戴是人臣居功地耶士英曰汝謀立潞藩
功安在王曰潞王朕叔父賢明當立二先生無傷國體內廷

之事不可向外廷道也其後左良玉部將金聲桓者已降於我

大清既而反江西迎曰廣以資號召聲桓敗曰廣投僕家池死鑣金壇人崇禎元年進士授南京戶部主事權稅蕪湖以憂歸服闋授南京禮部主事抗疏極論內臣言官二事帝怒斥為民初鑣世父尚書應秋叔父御史維持以附魏忠賢竝麗逆案鑣深恥之通籍後即交東林及被放讀書茅山廷臣多論薦之十五年起禮部主事進郎中為吏部尚書鄭三俊所倚而鑣權稅蕪湖時不能持廉遭物議為人好名頗飾偽給事中韓如愈疏論之罷歸福王立於南京馬士英既逐呂大器以鑣及雷縝祚曾主立潞王議令朱統鑣劾曰臣因言

鑣縝祚等皆曰廣私黨請悉置於理復指鑣權關事王令刑部逮治而士英劾周鍾從逆并及鑣鍾亦逮治鑣叔父維持鍾弟前蕭山知縣銓因言鑣與鍾有隙私刻燕中紀事國變錄諸書偽撰勸進表下江南策指鍾為之致臣家臣邑不能洗從逆名且鑣倡異謀罪在社稷詔所司并勘阮大鍼居金陵時諸名士顧杲等出畱都防亂公揭討之主之者鑣也大鍼以故恨鑣鑣獄急屬御史陳丹衷求解於士英為緝事者所獲丹衷出為長沙知府於是察處御史羅萬爵上疏痛詆鑣且徧詆東林謂已與大鍼張孫振有擁戴功詔并下所司究問明年三月誅妖僧大悲御史王懷因言斬百大悲不如斬鑣縝祚夫真主既出海內帖然乃今日冒皇子明日冒皇

后由二人譏訕新政故訛言繁興不立斬二人恐魚腹狐號乘間竊發而光祿卿祁逢吉鑣同邑人見人輒詈鑣亡何左良玉稱兵檄討士英罪言引用大鉞構陷鑣續祚士英大鉞益怒而鑣友人桐城左國棟蕪湖沈士柱皆嘗列名防亂公揭避大鉞客良玉所大鉞謂鑣召良玉兵王乃賜鑣續祚自盡鍾鑣從弟舉進士改庶吉士甫半歲李自成陷京師鍾出降賊徒顧君恩薦之牛金星用爲檢討賊敗南歸或傳其勸進表急下江南策中有比堯舜而多武功邁湯武而無慚德語遠近皆切齒而維持銓謂鑣僞爲之士英遂言給事中光時亨力阻南遷身先從賊庶吉士周鍾勸進未已上書勸賊早定江南劉澤清誦其勸進表又聞過先帝梓宮前不下馬

其伯父應秋維持皆魏忠賢鷹犬鍾復爲賊忠臣梟獍萃一門逆惡種兩世宜加赤族誅今其胞弟銓尚廁衣冠之班從兄鑣儼然寅清之署均當從坐用清逆黨鍾遂被逮明年四月良玉稱兵人情洶洶遂戮鍾及時亨續祚太湖人崇禎三年舉於鄉十三年夏帝思破格用人而考選止及進士特命舉人貢生就試教職者悉用爲部寺司屬推官知縣凡二百六十三人號爲庚辰特用而續祚得刑部主事十五年擢武德道兵備僉事十二月山東被兵續祚固守德州有詔獎勵乃疏劾督師范志完縱兵淫掠折除軍餉構結大黨帝心善其言以淫掠事責兵部而令續祚再陳志完者首輔周延儒門生也續祚意有所忌久不奏至明年五月延儒被旨下廷

議續祚乃奏言志完兩載僉事驟陟督師非有大黨何以至
是大僚則尚書范景文等詞林則諭德方拱乾等言路則給
事中朱徽沈胤培袁彭年等皆其黨也若夫座主當朝罔利
曲庇隻手有燎原之勢片語操生死之權稱功頌德徧於班
聯君前臣名盡廢常禮臣不忍見陛下以周召待大臣而大
臣以嚴嵩薛國觀自待也至中樞主計請餉必餽常例天下
共知他乾沒更無算疏入帝益心動命議舊計臣李待問傅
淑訓樞臣張國維及戶科荆永祚兵科沈迅張嘉言罪而召
續祚陛見令志完拱乾質前疏中語拱乾爲志完力辨帝領
之問續祚稱功頌德者誰對曰延儒招權納賄如起廢清獄
蠲租皆自居爲功考選臺諫盡收門下凡求總兵巡撫者必

先賄幕客董廷獻帝怒逮廷獻誅志完而令續祚還任初續
祚入朝自謂得總憲故攻擊銳厲及是頗沮喪尋以憂去福
王時統嶺劾曰廣因及之遂逮治初劉孔昭語阮大鍼當五
月初衆議迎立曰廣謂續祚其門人言福王不可立當設法
阻之至是大鍼據以入告且曰陛下龍飛之初欲設何法可
爲寒心曰廣尚不敢爲賈充而續祚公然欲爲成濟宜立正
西市明年二月給事中林有本劾續祚不孝不忠四月與鑑
同賜自盡

明史藁

列傳第一百五十

光祿大夫 經筵講官明史總裁戶部尚書加七級臣王鴻緒奉
敕編撰

徐石麒

高倬

黃端伯等

袁繼咸

左懋第

郝彪佳

徐石麒字寶摩嘉興人天啓二年進士授工部營繕主事筦
節慎庫魏忠賢兼領惜薪司所需銀錢悉從庫發石麒每持
故事格之忠賢屢使其黨諫於庭不為動會御史黃尊素坐
忤忠賢下詔獄石麒以座主故為盡力忠賢益怒遂執新城
侯王昇子下獄令誣賄石麒捕繫其家人勒完贓而削其籍
忠賢敗事乃白崇禎三年起南京禮部主事就遷考功郎中

八年佐尚書鄭三俊京察澄汰至公歷尚寶卿應天府丞民苦僉報馬戶率破家石麒更爲召募困遂解十一年春入賀時三俊爲刑部尚書下獄詞臣黃道周黃景昉於講筵救之帝意未釋石麒言三俊歷事四朝官至尚書炊煙屢絕下獄之日猾胥酌酒相慶謂朋謀欺罔臣敢剖心以明之帝得疏心動然猶嚴旨詰責之越數日三俊竟獲釋石麒官南京十餘年始入爲左通政十三年五月召對陳邊計甚悉中言陛下驟增兵餉至一千五百萬而兵又衰弱乞日講生聚教訓之方俾元氣充足卽滅賊有餘帝頷之累遷光祿卿通政使擢刑部右侍郎會推閣臣石麒與焉帝召對便殿獨不赴帝疑吏部尚書李日宣有私并與推房可壯等三人執下吏人

以石麒爲知幾亾何帝惡刑官輕擬日宣等獄奪左侍郎惠世揚職貶石麒二秩代掌部事石麒請留世揚賜已歸不允旋進左仍署部事陳新甲下獄給事中廖國遴楊枝起光時亨倪仁禎倡議必殺之已又爲營救於石麒大學士周延儒以下亦多救之石麒持之堅卒論死新甲旣死張若麒亦當誅多與援司官不敢決石麒急按之論如法時有清獄之詔石麒先上情法不合者數十人多獲減免尋擢本部尚書中官劉元斌以縱軍淫掠誅其黨王裕民坐欺隱不舉下獄帝欲殺之初令三法司同鞫後專付刑部石麒議令戍煙瘴奏成署院寺名以進都御史劉宗周等不知也帝怒其失出先召許宗周對曰此獄非臣讞不敢妄奏帝益怒宗周徐曰臣

雖不與聞然閱讞詞已由盡情事帝乃霽顏曰此奴錢神有靈譬百足之蟲至死不僵宗周曰刑官所執者法耳法如是止石麒非私裕民也帝曰此奴欺罔實甚卿等不知耳宗周曰內庭隱微之奸非臣等所知乃令石麒改讞詞竟棄之市頃之宗周以救姜埰熊開元獲嚴譴僉都御史金光辰救之奪職石麒兩疏請留不納埰開元既下詔獄移刑部定罪石麒據原詞擬開元贖徒埰請戍不復鞫訊帝怒責對狀石麒援故事對且引罪歸已乞宥司官帝怒不解除司官三人名石麒落職開任吏部尚書鄭三俊等公疏乞留不許福王監國南京召拜右都御史未任改吏部尚書再疏力辭舉三俊自代不允入朝奏陳省庶官慎破格行久任重名器嚴起廢

明保舉交堂廉七事褒納之時當考選與都御史劉宗周矢公甄別擬莊元辰等十三人爲科道馬士英庇其私人更易殆半御史黃耳鼎給事中陸朗有物議石麒以年例出之朗急賄奄人內傳畱用石麒憤發朗通內之罪朗恚疏詆石麒石麒遂稱疾乞休無何耳鼎亦兩疏劾石麒一言嘗劾吳昌時代爲報復一言枉殺陳新甲致敗款局石麒益憤歷敘昔年和議始末及新甲欺罔隱情因力請罷斥卒引去石麒剛方清介值權奸用事鬱鬱不得志士英挾定策功將圖封石麒議格之中貴田成輩納賄請囑石麒皆拒不應且疏劾由是內外皆怨構之去去後以登極恩加太子太保明年南都亾石麒移居城外及郡城將破石麒曰吾大臣也城亾與亾

豈宜苟活復入居城中以閏六月二十六日朝服自縊死年六十有八

高倬忠州人天啓五年進士除德清知縣調金華崇禎四年徵授御史鎮守薊鎮中官鄧希詔與總督曹文衡相訐奏倬言文衡骯髒成性必不能仰鼻息於中官希詔睚眦未忘又何能化戈矛爲同氣封疆事重宜撤希詔安文衡心若文衡果不足用亦宜速爲更置勿使中官參之諸邊鎮臣如希詔者不少使人人效希詔將督撫之展布益難卽諸邊督撫如文衡者亦不少使人人效文衡將邊事之廢壞愈甚惟聖明早計毋以封疆爲戲疏入忤旨貶一秩視事巡視草場失火與給事中馬思理監督王事王淪初江之遠竝褫職下吏廷

臣屢疏申救俱不納逾年熱審給事中吳甘來等復以爲言始釋歸起上林署丞稍遷大理右寺副十一年五月火星逆行詔脩省倬以近年刑獄滋繁而法官務停閣請勅諸司尅期奏報大者一旬小者五日其奉旨覆讞者或五日三日務俾積案盡疏罔罔衰減帝爲採納屢遷南京太僕卿太僕故駐滁州倬以大盜日擾江北而滁爲南都西北門戶請卽募州人爲兵俾保障鄉土從之十六年二月擢右僉都御史提督操江其秋帝欲專任武臣劉孔昭汰操江文臣召倬別用未赴而京師陷福王立於南京用爲工部右侍郎御用監內官請給工料錢置龍鳳几榻諸器物及宮殿陳設金玉諸寶計貲數十萬倬及尚書何應瑞力請裁省光祿寺請辦御用

器至一萬五千七百有奇倬又以為言皆不納明年二月由左侍郎拜刑部尚書

大清兵入南京倬投繯死是時大臣殉難者惟倬與張捷楊維垣而庶僚則有黃端伯劉成治吳嘉胤龔廷祥以及雜流諸生陳于階吳可箕黃金璽陳士達之屬黃端伯字元公建昌新城人崇禎元年進士歷寧波杭州二府推官行取赴都以母憂歸益王居建昌不法端伯服闋入都疏陳其狀王亦劾端伯離間親藩及出妻酬酒諸事有詔候勘端伯避居廬山福王立大學士姜曰廣薦起之明年三月授儀制主事五月

大清兵渡江逼南都百官皆迎降端伯不出遣使捕繫之閱

四月屢諭之降不動卒就戮成治字廣如漢陽人崇禎七年進士歷官戶部郎中

大兵至忻城伯趙之龍將出降先入戶部封府庫成治憤拳擊之之龍亟走免已聞百官皆降自經於堂上嘉胤字繩如松江華亭人天啓四年舉於鄉歷官戶部主事為人方正不苟時已奉使出都聞變亟還謁方孝孺祠從容投繯死廷祥字伯興無錫人馬世奇門人也崇禎十六年舉進士為中書舍人知國祚必移寄書其子預以死自誓及

大兵至南都破與友人約偕死其友背之廷祥肅衣冠步至武定橋投水死于階上海人為欽天監博士自縊於公署可箕徽州人為國子監生題詩於衣衾上縊死雞鳴山關壯繆

祠金璽江寧人聞大臣皆迎降大書於壁曰大明武舉黃金璽一死以愧人臣而懷二心者遂自經士達南京布衣投水死

袁繼成字季通宜春人天啓五年進士授行人崇禎三年冬擢御史戶部尚書畢自嚴議加派繼成力陳五可慮不能從監臨會試坐縱懷挾舉子謫南京行人司副將行以熱審在邇力請寬恤其意爲錢龍錫張鳳翔易應昌發也已而諸人果獲釋遷主客員外郎主事周鏞論宦官削籍繼成抗疏救之言陛下惡忠臣沽名莫若收其名歸之於上唐陸贄有言諫者多表我之能受諫者激表我之能容使鏞言當陛下受之名在上不當陛下容之名亦在上况鏞所言多指斥內臣

以此獲罪恐廷臣以鏞爲戒內臣之過壅於上聞非所以通羣情杜奸慝也不報七年春擢山西提學僉事未行會總理戶工二部中官張彝憲有朝覲官齋冊之奏繼成上疏曰陛下允內官之請特在剔釐奸蠹非欲羣臣屈膝內官也此令一出靡然成風上自藩臬下至守令莫不次第參謁屏息低頭得免呵責爲幸夫一人輯瑞萬國朝宗諸臣未覲天子之光先拜內臣之座尚得謂有廉恥乎逆璫方張乾兒義子猶昏夜拜伏今則白晝公庭恬不知怪率天下爲無恥事此臣所太息也至諫官以言爲職不言則有墨刑言而被罰此衰世事近者給事中李世祺以論輔臣溫體仁旣降罰之矣復罪及考選之銓臣吳鳴虞此何意也語曰養鳳欲鳴養鷹欲

擊若鳴而籍其口飛而繼其羽養鳳與鷹何益且大臣有過言官言之卽斥爲邪試問言官以從諛大臣爲邪乎糾正大臣爲邪乎言官與大臣忤斥以爲比令言官與大臣合交結詭隨其爲比不更甚乎今考選在卽銓臣必將徧問諸臣汝必不劾大臣然後授臺諫臺諫相與括囊爲大臣者終其身無敢議此大臣所甚利忠臣所甚憂也帝以浮詞切責之彝憲見疏大恚奏言朝覲官齋冊所以尊朝廷繼咸復駁之曰尊朝廷莫大於尊朝廷之典制守令見藩臬行屬禮典制也見內臣行屬禮非典制諸司入都投冊吏部典制也先謁內臣非典制事屬典制雖坐受猶以爲安事屬中官雖長揖祇增其辱伏見高皇帝建官內臣自巾服靴帽皆與外臣別而

尤嚴交結之條內臣不得繩外臣猶外臣不得繩內臣也臣前疏愛外臣以恥正愛彝憲以禮奈何坐臣以蹴芻重罰夫路馬不齒禮豈爲外臣設而乃妄引爲殺臣阱乎帝復切責之乃孑身赴任較閱公明聲望大著巡撫吳姓薦其廉能請加優擢而巡按御史張孫振以請屬不應銜之特疏誣繼咸賊私事帝怒逮繼咸責姓回奏姓極稱繼咸賢斥孫振誣詆諸生聞繼咸逮羣隨至都伏闕訴冤繼咸亦列上孫振請屬狀及其賊賄數事都御史言孫振倒置是非大負巡方職有詔逮訊繼咸得復官孫振坐謫戍天下快之十年除湖廣參議分守武昌時宗室橫甚每誣人負責捕禁於家罄貲乃已謂之打馬繼咸嚴禁之宗室數人剽掠城中白之楚王論治

如律賊首呂瘦子作亂討平之巡撫余應桂知其能奏兼僉事分巡武昌黃州賊老回革裏眼等七大部犯黃陂黃安繼成馳救賊引退與黃岡知縣徐調元築城六千餘丈一月而竣十二年以故官移淮揚督鹽中官楊顯名勒監司行屬禮文牒用申請繼成悉釐正之顯名怒奏於朝詔鑄二秩調用兵部尚書傅宗龍舉繼成邊才帝不納督師楊嗣昌以其知兵引參軍事明年四月用廷推擢右僉都御史撫治鄖陽未一年襄陽失陷被逮宗室士民頌其善政乞以身代罪留撫殘疆帝不許遣戍貴州十五年秋吏部推爲總督帝責所司擅舉寢其議已而廷臣交薦起故官總理河北屯政未赴會賊逼江西廷議設重臣總督江西湖廣應天安慶軍務駐

九江乃擢繼成兵部右侍郎兼右僉都御史以行時繼成在南都聞命賊已陷武昌左良玉擁兵東下人情洶洶繼成遇於蕪湖激以忠義良玉遂還復武昌而朝議忽以呂大器來代命繼成復督屯政大器與良玉不相能長沙袁州俱陷疆事益迫廷議復推繼成代之帝曰繼成久改屯撫遷延不赴法宜重懲念江西告警許戴罪辦賊不效則并治前罪甫抵鎮京師陷福王立頒詔至武昌良玉不肯拜繼成致書備言倫序之正乃始拜受及高傑封興平伯繼成因入朝面奏曰封爵以勸有功無功而封則有功者不勸跋扈而封則跋扈者愈多王深然之曰事已行奈何忻城伯趙之龍曰馬士英引傑渡河宜令往輯繼成亦言之王曰彼不欲往今輔臣史

可法願往繼成對曰陛下嗣位初雖以恩澤收人心尤當以紀綱肅衆志蓋君德以英分爲主乞振作精神申明法紀冬春間淮上未必無事臣雖駑願奉六龍爲澶淵之舉王有難色閣臣姜曰廣曰繼成所言非遠爲此事要不可不存此心繼成又詣榻前密奏曰左良玉雖無異圖然所部多降將非孝子順孫且陛下初登大寶人心未免危疑意外不可不慮臣當星馳回鎮許之繼成赴閣責可法不當封傑士英兼之俄陳致治守邦大計引宋高宗用黃潛善汪伯彥事士英以爲譏已益不悅會湖廣巡按御史黃澍挾良玉勢劾奏士英十大罪士英深恨之使人糾澍賊罪擬旨逮治澍謀於良玉陰諷將士大譁欲下南京索餉解救澍繼成爲留江漕十萬

石餉十三萬金給之且代澍申理以良玉依仗澍爲言士英不得已免澍逮繼成既與士英隙所陳奏及題周文武官悉被停寢明年正月言今元朔受賀人以其拜手稱觴之日陛下當以爲嘗膽臥薪之日乞痛念大恥未雪以周宣之未央問夜爲可法以晚近長夜之飲角觥之戲爲可戒省土木之功節浮淫之費戒論臣工後私鬪而急國警臣每嘆三十年來徒以三案葛藤血戰不已若要典一書已經先帝焚毀何必復理其說書苟未進宜寢之卽已進宜毀之至王者代興從古亦多異同平勃迎立漢文不聞窮治宋虛之過房杜決策秦邸不聞力究魏徵之非固其君謬達大度亦其大臣公忠善謀翊贊其美請再下寬大之詔解圍扉疑入之囚斷草

野株連之案王降旨俞其言而士英輩方以要典排善頗力持之不毀也御史袁弘勛者初以賊遣戍赦還橫於鄉為張若麒所劾再遣戍至是復官益咆哮上疏論三案請追罪王之案係愼行楊漣左光斗及鄭三俊吳甞等而末言繼成倒身怙逆罪甚無將應與案內諸奸並究繼成復疏辨報聞時羣小皆不喜繼成汰其軍餉六萬軍中有怨言繼成疏爭不得力求罷又不許繼成以江上兵寡而鄭鴻逵戰艦又不還議更造檄九江僉事葉士彥於江流截買樹木士彥家蕪湖與諸商艦封還其檄繼成恥令不行疏劾士彥士彥同年御史黃耳鼎亦劾繼成且言繼成有心腹將校勸左良玉立他宗良玉不從蓋欲離兩人交也良玉先不拜監國詔聞之益

疑懼乃抗疏力辨明與繼成無隙詆耳鼎受指使而言要典宜再焚議者遂謂繼成與良玉倡和脅制朝廷由是羣小銜繼成不已將召入害之推為刑部右侍郎王曰彼地須繼成耳此地何須不允復推為戶部右侍郎亦不允時都下有偽太子之說寧南侯良玉疏爭不納遂與士英輩有隙繼成疏言太子真偽非臣所能懸揣真則望行良玉言偽則不妨從容審處多召東宮舊臣辨識以解中外之疑疏未達良玉已反初繼成聞李自成兵敗南下恐由岳州犯長沙入江西境命部將郝效忠陳麟鄧林奇守九江自統副將汪頤畫李士元等援袁州已登舟矣聞良玉反復旋九江良玉舟抵北岸貽書言願握手一別為皇太子死九江士民泣請繼成往紓

一方難繼咸曰寧南語雖順舉動與前乖往必墮計士民請益堅遂與監紀余有灝會良玉於舟中良玉言及太子下獄事大哭次日舟移南岸繼咸恐良玉入城偕諸將以單騎往良玉袖出皇太子密諭劫諸將盟繼咸正色曰密諭從何來先帝舊德不可忘今上新恩亦不可負良玉不得已約不破城改檄爲疏駐軍候旨繼咸歸集諸將城樓灑泣曰兵諫非正晉陽之甲春秋所惡可同亂乎約與俱拒守而效忠及部將張世勲等出與良玉合兵遂入城殺婦女掠財物繼咸欲自盡黃澍入署拜泣曰寧南無異圖公以死激成之大事去矣副將李士春密白繼咸隱忍到前途王文成之事可圖也繼咸以爲然出城面責良玉良玉時已疾篤矣望城中火光

大哭曰予負袁公嘔血數升是夜死其子夢庚祕不發喪諸將推爲帥急移舟東中朝皆疑繼咸同反而繼咸所上書率不得達乃書衣帶以死自誓會

大兵已下南都諸將多納款繼咸勸夢庚旋師不聽乃遣人語林奇等不可爲不忠事林奇與碩畫士元移舟避皖湖中陰遣人迎繼咸而效忠已給繼咸赴其軍云入南昌爲後圖繼咸信之將及湖口夢庚效忠已降於

大清遂遣將執之北上明年三月執不肯降見殺同時有張亮者四川人舉於鄉崇禎時歷榆林兵備參議著能聲用薦改安廬兵備監禁軍討賊頗有功十七年擢右僉都御史巡撫其地福王旣立亮聞李自成兵敗西奔奏言賊勢可乘請

解職視賊所向督兵進討從之尋召入京議事馬士英輩意不在賊復遣還任明年四月左夢庚陷安慶亮被執及夢庚北行挾亮與俱乘間赴河死

左懋第字蘿石萊陽人崇禎四年進士授韓城知縣有異政遭父喪三年不入內寢事母盡孝十二年擢戶科給事中疏陳民病兵弱臣工推委國計虛耗四弊責備內外諸臣俄言去歲被兵請守城抗節陷陣捐軀及貞女烈婦宜盡加旌獎行間則申嚴軍律絕其退縮之心竝優旨報聞已陳貴粟之策請令天下贖罪者盡輸粟鹽筴則復開中之舊務令輸粟塞垣用充軍食時以彗星見詔停刑懋第慮遠方未曉請馬上速傳且極陳民困請嚴禁將士剽掠有司朘削又以輦下

多飢民兩疏陳散米散錢收養嬰孩之法明年正月言近奉免徵勦餉之旨小民聞之歡聲雷動但四方遼遠或數千里或萬里未必卽知卽知之而司下府府下州州下縣動踰旬月則有司先已徵收小民不沾實惠亦乞馬上速行帝並採納三月帝以風靈示異布袍齋居虔禱而風靈不止懋第言去秋彗星之變停刑詔朝下而夕卽減何今日不然得毋陛下有其文未行其實致上天不信乎臣敢直以實進練餉之加原非得已但明旨減兵以省餉天下共知之而餉猶未省何也乞自今歲以後因兵徵餉預使天下知應加之數而官吏無所逞其奸以信陛下之明詔若刑獄一事乞以睿慮之疑信定諸囚之死生諸疑於心與疑信相半者悉從罪疑惟

輕之意則停刑可以止禁豈解網不可以返風乎尋言陛下
屢沛德音而四方死者猶枕藉盜賊猶載途由蠲停者止一
二存留之賦有司迫考成催徵未敢緩是以無救於凶荒也
請於極荒州縣下詔速停并令有司息訟專以救荒爲務庶
殘黎小補帝納其言於是上災七十五州縣新舊練三餉並
停中災六十八州縣止徵練餉下災二十八州縣秋成督徵
十四年三月洛陽襄陽皆陷懋第極論楊嗣昌罪曰賊之披
猖由嗣昌薦熊文燦所致文燦既辟嗣昌當並坐疏上而嗣
昌已死乃止尋遣懋第督催漕運道中上疏言臣自靜海抵
臨清見人民飢死者三疫死者三爲盜者四米價至二十四
兩人死卽取以爲食惟聖明垂念尋言臣自魚臺至南陽民

爲流寇殺戮村市皆虛其他飢疫死者屍積水涯河爲不流
賑揀安可不速也明年陳安民息盜策請核荒田察逋戶予
以有生之樂鼓其耕種之心尋又言臣有事河干一載每進
父老詢疾苦率言練餉之害夫三年來農怨於野商嘆於途
如此重派所練何兵今在何所勦賊禦邊其效安在四海萬
姓之膏血旣不登諸天府又未養及健兒空使衆心瓦解一
至此極陛下猶不動念乎是時衆賢登進小人忌之帝入蜚
語因會推事下吏部尚書李日宣等於獄懋第極論讒言不
可信請帝保全善類俄言臣去冬抵宿遷晤督漕臣史可法
言山東米價一石至二十兩而河南乃至一百四五十兩漕
儲多逋朝議方需本色不收折色今淮鳳間麥大熟如收兩

地折色易麥轉輸豈不大利臣因思劉晏有轉易之法今歲河北大稔山左東宛二郡亦有收誠出內帑二三十萬分發所司及時收糴於國計誠便帝卽命議行懋第屢遷刑科左給事中保定總兵官楊德政兵潰潛逃已伏法而詔旨猶密封不抄懋第言德政有罪伏誅正當與天下共見何必密自今非軍機重事宜仍許抄傳再疏言紅本有當密有不當密者自十一年樞臣楊嗣昌欲蒙塞耳目是以密封最多沿弊已久不可不改皆不允尋因考選薦故給事中姚思孝何楷李化龍張作楫御史成勇李模詹爾選林蘭友李右讜編修楊廷麟部郎葉廷秀其冬京師被兵劾督師范志完順天巡撫潘永圖永平巡撫馬成名防禦疎忽皆獲罪十六年秋出

察江防劾南京大教場提督孫尚進貪橫亦罷去明年五月福王立進兵科都給事中旋擢右僉都御史巡撫應天徽州諸府時

本朝大軍連破李自成兵大臣高弘圖等議遣使通好而難其人懋第以母陳氏歿於北京欲因此扶襯還葬遂請行乃拜兵部右侍郎兼右僉都御史與左都督陳弘範太僕少卿馬紹愉偕往而命懋第經理河北聯絡關東諸軍馬紹愉者嘗爲郎兵部尚書陳新甲令通款事於

大清至義州而還未能得要領其後新甲誅死而紹愉以督戰致衄爲懋第所劾罷及是議遣使紹愉已起官郎中乃進爲少卿副懋第言臣此行致祭先帝后梓宮訪東宮二

王蹤跡誼不敢辭但既充使臣勢不能兼封疆重寄且紹愉前爲臣劾罷今不當與共事如必用臣經理則乞命洪範同紹愉出使而假臣一旅偕山東撫臣收拾山東以待不敢復言北行如用臣與洪範北行則去臣經理聯絡之銜但銜命而往謁先帝梓宮訪東宮二王蹤跡而罷紹愉勿遣閣部議止紹愉改命原任薊督王永吉王令仍遵前諭懋第瀕行又言臣此行生死未卜願以辭闕之身効一言臣所望者恢復而近日朝端行事似少恢復之氣願陛下時時以先帝仇恥爲心瞻高皇之弓劍則思成祖列聖之陵寢何存撫江上之黎氓則念河北山東之赤子誰卹更望廷臣時時以整頓士馬爲事勿以議和爲必成勿以和成爲足恃必能渡河而戰

始能扼河而守必能扼河而守始能畫江而安未言先帝殉難臣少由諫諍臣少也遠如幽燕之地願勿以在遠而忘近如汲直之流願勿以逆耳而棄衆聽其言時齋白金十萬兩黃金一千兩緞絹數萬匹以兵三千護行十月朔次張家灣本朝傳令止許百人入都懋第服衰絰而往至則館之鴻臚寺以不得祭梓宮卽於旅所遙祭是月二十有八日卽遣還甫出京洪範請身赴江南招諸將劉澤清等降附而留懋第等勿遣乃自滄州追還改館太醫院懋第處之恬然讀書不輟

順治二年六月懋第聞南京失守慟哭其從弟懋泰先爲吏部員外郎降賊後歸

本朝授官來謁懋第勸之降懋第曰此非吾弟叱出之至閏六月十二日與從行兵部司務陳用極游擊王一斌都司張良佐劉統王廷佐俱以不降誅而紹愉獲免

祁彪佳字弘吉山陰人五世祖司員御史池州知府曾祖清陝西右布政使伯祖汝東兩淮鹽運使父承燦江西右參政彪佳生而英特丰姿絕人年十七舉於鄉又四年第天啓二年進士授興化府推官吏民易其年少彪佳剖決精明庶務畢舉始畏服巡按御史率依推官爲耳目其胥吏奸惡無問者彪佳倡議凡訪犯先從推官左右始人服其公居數年政績大著以外艱歸崇禎四年起擢御史疏陳賞罰之要言黔功因一級疑稽三年之敘且恩及督撫總帥帷幄大臣而陷

敵衝鋒之將士不預何以勵行間山東之變六城連陷未嘗議及一官欺蒙之習不可不破帝亟命議行時東西用兵軍情奏報悉禁抄傳彪佳極言不可踰年言九列之長詰責時聞憲臣陳于廷四朝遺老遽被重譴恐諸臣怵嚴威競爲迎合揣摩以保名位臣所慮於大臣者此也方伯或至一二考臺員或至十餘載未得遷除而監司守令多取秩停俸臣子精神才具不能稍有餘地展布發舒急功赴名之心不勝其掩罪匿瑕之念臣所慮於小臣者此也撫按之事多令中官監視會同開水火之端其患顯啓交結之漸其患深臣所慮於內臣者此也忤旨譴責尋上合籌天下全局疏以策關寧制登海爲二大要分析中州秦晉之流賊江右楚粵之山賊

浙閩東粵之海賊滇黔楚蜀之土賊爲四大勢極陳控制駕馭之宜而歸其要於戢行伍以節餉寔衛所以銷兵帝褒納之復陳民間十四大苦曰里甲曰虛糧曰行戶曰搜贓曰欽提曰隔提曰訐訟曰窩訪曰私稅曰私鑄曰解運曰馬戶曰鹽丁曰難民帝善其言下之所司亦不能盡用也南京兵部尚書傅振商衰邁劾罷之出按蘇松諸府革弊政興良法廉積猾四人杖殺之宜興民焚翰林陳于鼎于泰廬發其祖墓并首輔周延儒祖墓彪佳捕治如法而於延儒無所徇延儒憾之暨回道考覈諷主考鐫秩一級帝察其無罪令降俸而已尋以侍養歸家居九年母服終召掌河南道事劉宗周金光辰得罪抗疏乞留不納十六年佐大計問遺莫敢及門疏

劾戶部侍郎王正志督餉山東聞警輒移家避去得旨速核吳昌時主年例不移會掌道彪佳極論其紊制弄權昌時迄獲罪尋刷卷南畿乞休不允便道還家北都變聞慟哭趨赴南京會福王至以五月朔日謁孝陵居內守備府諸臣進謁彪佳首陳紀綱法度爲立國本次及發號用人二事越二日王將監國侍郎呂大器初主立潞王及是懼禍欲自媚請後日卽登極彪佳言監國名極正遽議登極何以服人心謝江北將士請俟發喪服滿始議其儀從之又二日疏陳致治大本語甚剴切王嘉納之高傑駐揚州縱兵淫掠士民奔避江南無賴民乘機剽斂廷議以彪佳嘗按吳有威望命往宣諭斬倡亂者數人宣布赦文甄別有司賢否一方遂安其月遷

大理寺丞旋擢右僉都御史巡撫江南蘇州諸生聞其鄉少
詹事項煜等從賊紛紛檄討奸民肆焚劫煜與大理寺正錢
位坤通政司參議宋學顯禮部員外郎湯有慶四家蕩洗無
遺常熟又焚給事中時敏家三代四棺俱毀彪佳請將從逆
諸臣議罪使士庶無所藉口則焚掠之徒可加等治允之詔
設廠衛緝事官彪佳上言洪武初官民有犯或收繫錦衣衛
當事者因非法凌虐高皇帝乃於二十年焚其刑具送囚刑
部是祖制原無詔獄也後乃以羅織爲事雖朝廷爪牙寔權
奸鷹狗舉朝盡知其枉而法司無敢雪慘酷等來周平反無
徐杜此詔獄之弊也永樂間設立東廠始開告密無籍兇徒
投爲廝役飛誣徧及善良赤手立致鉅萬招承多出私拷怨

憤充塞京畿欲絕苞苴苞苴彌盛欲清奸宄奸宄益多此緝
事之弊也若夫刑不上大夫祖宗忠厚立國之本及逆瑾用
事始去衣受杖刑章不歸司敗撲責多及直臣本無可殺之
罪乃加必死之刑血濺玉階肉飛金陛班行削色氣短神搖
卽卹錄隨頒已魂驚骨削矣朝廷徒受懷諫之名天下反歸
忠直之譽此廷杖之弊也疏奏大學士姜曰廣擬俞旨羣奄
共撓之曰廣抗疏力爭曰緝事不除宗社且不可知何廠衛
之有乃命五城御史體訪督輔史可法部將劉肇基陳可立
張應夢于永綬駐京口浙江入衛都司黃之奎亦部水陸兵
三四千戍其地之奎御軍嚴四將兵恣橫刃傷民浙兵縛而
投之江遂有隙已而守備李大開統浙兵斬鎮兵馬鎮兵遂

與相擊大開中矢死亂兵大焚掠死者四百人民財罄盡彪
佳疾至而承綬等遁去奏聞命四將赴可法軍前聽核不能
罪也彪佳行視被難家凋卹備至民咸悅四鎮咸欲寄家江
南憚彪佳威以書通問報書感以大義自是無一卒渡江者
高傑據瓜洲尤跋扈彪佳尅期往會至期風大作傑謂彪佳
必不敢渡彪佳攜吏卒數人往傑大駭異盡撤兵衛會於大
觀樓彪佳披肝膈勉以共獎王室傑曰傑聞人多矣如公傑
甘爲死公一日在吳傑一日遵公約共飯而別時馬士英輩
疾彪佳甚嗾私人朱統鐮劾之丹徒張捷里居銜彪佳接之
疎及是掌吏部御史張孫振復希指劾之謂彪佳初沮登極
者爲潞王也十一月彪佳竟移疾去明年五月南都失守六

月杭州復失守彪佳卽絕粒至閏六月四日給家人先寢遂
端坐池中而死年四十有四唐王贈少保兵部尚書諡忠敏

明史藁

列傳第一百五十終

明史藁

明史藁

明史藁

列傳第一百五十一

光祿大夫 經筵講官明史總裁戶部尚書加七級臣王鴻緒奉

敕編撰

左良玉

鄧賀人龍

黃得功

高

傑

劉澤清

劉肇基

左良玉字崑山臨清人官遼東車右營都司崇禎元年寧遠兵變巡撫畢自肅自經死良玉坐削職回衛已復官總理馬世龍令從遊擊曹文詔援玉田豐潤直抵遵化論恢復四城功與文詔等俱進秩隸昌平督治侍郎侯恂麾下大凌河圍急詔昌平軍赴援總兵尤世威護陵不得行薦良玉可代已恂薦為副將戰香山杏山下錄功第一良玉長身頰面驍勇

善左右射目不知書多智謀撫士卒得其歡心以故戰輒有功時陝西賊入河南圍重慶廷議令良玉將昌平兵往勦大指專辦河南會賊寇修武清化者竄入平陽因檄良玉入山西禦之頗有斬獲河南巡撫樊尚璟以良玉駐澤州扼豫晉咽喉可四面爲援兵詔從之時曹文詔將陝西兵帝令良玉受尚璟節制與文詔同心討賊六年正月賊犯隰州陷陽城良玉敗之於涉縣之西陂二月良玉兵與賊戰武安大敗尚璟罷以太常少卿元默代之三月賊再入河內良玉自輝縣逐之賊奔修武良玉擊之萬善驛至柳善口大敗之擒賊首數人賊遂西奔河南額兵僅七千數被賊折亡殆盡良玉將昌平兵二千餘數戰雖有功勢孤甚總兵鄧玘方立功萊州

乃命將川兵益以石砭土司馬鳳儀兵馳赴良玉與共角賊已而鳳儀以孤軍戰沒於侯家莊當是時賊勢已大熾縱橫三晉畿輔河北間諸將曹文詔李臯艾萬年湯九州玘良玉等先後與賊戰勝負略相當良玉玘辦河南屢破之於官村於沁河於清化於萬善良玉又扼之武安八德斬獲尤多會帝命倪寵王樸爲總兵將京營兵六千赴河南以中官楊應朝盧九德監其軍而別遣中官監良玉等軍職方郎中李繼貞曰良玉李臯身經百戰位反在寵樸下恐聞而解體乃令良玉臯署都督僉事爲援勦總兵官與寵樸體相敵京營兵至共擊賊數有功良玉敗賊濟源河內又敗之永寧青山嶺銀洞溝又自葉縣追至小武當山皆斬賊魁甚衆其冬賊西

奔者復折而東良玉九州扼其前京營兵尾其後賊大困官軍連破之柳泉猛虎村賊張妙手賀雙全等三十六家詭詞乞撫於分巡布政司常道立因監軍應朝以請諸將俟朝命不出戰會天寒河冰合賊遂從澠池徑渡巡撫默率良玉九州卑珙兵待之境上賊乃竄盧氏山中由此自鄭襄入川中折而掠秦隴復出涑川中湖北以犯河南中原益大殘破而三晉畿輔獨不受賊禍者十年賊既渡河去良玉與諸將分地守陳奇瑜盧象昇方角賊秦楚七年春夏間中州幸無大事既而奇瑜失李自成於車箱廷議合晉豫楚蜀兵四面勦之賊乃分軍三一向慶陽一趨鄖陽而一出關趨河南趨河南者又分爲三郡邑所在告急良玉扼新安澠池他將陳治

邦駐汝州陳永福扼南陽皆坐甲自保而已不能大創賊也賊每營數萬兵番進皆因糧宿飽我兵寡備多饋餉不繼賊介馬馳一日夜數百里我步兵多騎少行數十里輒疲乏以故多畏賊而良玉在懷慶時與督撫議不合因是生心緩追養寇多收降者以自重督撫檄調不時應命稍稍露跋扈端矣十二月遇賊於磁山大戰數十追奔百餘里八年正月河南賊破潁州毀鳳陽皇陵其陷鹿邑柘城寧陵通許者良玉在許州不能救四月督師洪承疇在汝州令諸將分地遮賊尤世威守維南陳永福控盧氏永寧鄧玘尤翟文張應昌許成名遏湖廣以吳村瓦屋乃內鄉浙川要地令良玉與湯九州以五千人扼之未幾鄧玘以兵譁死而曹文詔討陝賊敗

歿賊益張遂超盧氏奔永寧巡撫默被逮未去檄良玉自內鄉與陳治邦馬良文等援盧氏八月敗賊於鄆陵九月躡賊於邾之神屋山賊連營數十里番休更戰以疲我兵良玉收其軍而止賊再攻密良玉自邾援之乃去十月良玉抵靈寶合遼東總兵祖寬兵剪賊於澗口焦村焦村朱陽關地也十一月李自成出朱陽關張獻忠久踞靈寶闖王高迎祥亦與合良玉寬禦之靈寶不能支陝州陷賊東下攻雒陽良玉寬從巡撫陳必謙救雒陽賊乃去迎祥自成走偃師鞏獻忠走嵩汝良玉出雒追迎祥自成寬分擊獻忠救汝會總理盧象昇至自湖廣與寬大敗賊汝西九年二月賊敗於登封郟城鎮走石陽關與伊嵩之賊合故總兵九州由嵩縣深入與良

玉夾勦良玉中道遁歸九州乘勝窮追無援敗歿良玉反以捷聞五月象昇遣祖寬李重鎮隨陝西總督洪承疇西行良玉軍最強又率中州人故獨久留之而以其驕怙難用用孔道與代其偏將趙桂駐靈寶防雒西良玉與羅岱駐宜永防雒東七月良玉兵抵開封由登封之唐莊深入擊賊自辰鏖至申賊不支西走陳永福方敗賊於唐河賊至田家營良玉渡河擊之斬獲頗衆九月巡撫楊繩武劾良玉避賊責令戴罪自贖十年正月賊老獬合曹操闖場天諸部沿流東下安慶告警詔良玉從中州救之良玉抵六安與賊遇部將岱道興乘勝連戰大破賊賊走霍潛山會馬嬭劉良佐亦屢破賊於桐城廬州六安賊在滁和者亦西遁江北警少息應天

巡撫張國維三檄良玉入山搜勦不應放兵掠婦女屯舒城月餘河南監軍太監力促之始北去賊已飽掠入山矣已浙川陷良玉擁兵不救以六安破賊功詔落職戴罪尋復之賊東下襲六合攻天長分掠瓜州儀真破盱眙良玉堅不肯救令中州士大夫合疏留已帝知出良玉意不能奪也十月總理熊文燦至安慶部檄以良玉軍隸焉良玉輕文燦不爲用十一年正月良玉與總兵陳洪範大破賊於鄖西張獻忠假官旗號襲南陽屯於南關良玉適至疑而急召之獻忠逸去追及發兩矢中其肩復揮刀擊之面流血其部下救以免遂逃之穀城未幾請降良玉知其僞力請擊之文燦不許九月文燦勦鄖襄諸賊良玉與洪範及副將龍在田擊破之雙溝

營斬首二千餘級十二月河南巡撫常道立調良玉於陝州賊乘盧氏虛遁入內浙是月許州兵變良玉家在許殲焉十二年二月良玉率降將劉國能入援京師詔還討河南賊兵過壩頭吳橋大掠太監盧九德疏聞詔令戴罪已而破賊馬進忠於鎮平關進忠降又與國能再破賊李萬慶於張家林七里河萬慶亦降七月獻忠叛去房縣良玉與羅岱追之使岱爲前鋒已隨其後至羅猴山軍乏食伏起岱馬掛於藤抽刀斷之蹶而復進棄馬登山賊圍急矢盡被獲良玉大敗奔還軍符印信盡失棄軍資千萬餘士卒死者萬人事聞以輕進貶三秩十三年春督師楊嗣昌薦良玉雖敗有大將才兵亦可用遂拜平賊將軍當是時賊分爲三西則張獻忠踞楚

蜀郊東則革裏眼左金王等四營豕突隨應麻黃南則曹操過天星等十營伏漳房興遠間閏正月良玉合諸軍擊賊於枸坪關獻忠敗走良玉乃請從漢陽西鄉入蜀追之嗣昌謀以陝西總督鄭崇儉率賀人龍李國安從西鄉入蜀而令良玉駐兵興平別遣偏將追勦良玉不從嗣昌檄良玉曰賊勢似不能入川仍當走死秦界耳將軍從漢陽西鄉入川萬一賊從舊路疾趨平利仍入竹房將何以禦不則走寧昌入歸巫與曹操合我以大將尾追促賊反楚非算也良玉報曰蜀地肥衍賊渡險任其奔軼後難制且賊入川則有糧可因回鄭則無地可掠其不復竄楚境明矣夫兵合則強分則弱今已留劉國能李萬慶守鄭若再分三千人入蜀卽駐興平兵

力已薄賊來能遏之耶今當出其不意疾攻之一大創自然瓦解縱折回房竹間人跡斷絕彼從何得食况鄭兵扼之於前秦撫在紫興扼之於右勢必不得逞若寧昌歸巫險且遠曹操獻忠兩不相下倘窮而歸曹必內相吞其亡立見良玉已於二月朔涉蜀界之漁溪渡矣嗣昌度力不能制而其計良是遂從之時獻忠營太平縣大竹河良玉駐漁溪渡未幾總督崇儉引其兵來會賊移軍九滾坪見馬瑙山峻險將據之我師始抵山下賊已踞山顛乘高鼓譟良玉下馬周覽者久之曰吾知所以破賊矣分所進道爲三已當其二秦兵當其一今日聞鼓聲而上兩軍夾擊賊陣堅不可動鏖戰久之賊大潰墜崖澗者無算追奔四十里良玉兵斬掃地王曹威

白馬鄧天王等渠魁十六人獻忠妻妾亦被禽遁入興山歸州之山中尋自鹽井竄興歸界上是役也良玉功第一事聞加太子少保四月良玉進屯興安平利諸山連營百里諸軍憚山險圍而不攻久之獻忠自興房走白羊山而西與羅汝才合七月良玉乘勝擊過天星降之過天星者名惠登相既降爲良玉部將初良玉受平賊將軍印寔驕不肯受督師約束而賀人龍屢破賊有功嗣昌私許以人龍代良玉及良玉奏瑪瑙山捷嗣昌語人龍須後命人龍大恨具以前語告良玉良玉亦內恨當獻忠之敗走也追且及遣其黨馬元利操重寶啗良玉曰公所部多殺掠而閣部猜且專無獻忠卽公滅不久矣良玉心動縱之去監軍萬元吉知良玉跋扈不可

使勸嗣昌令前軍躡賊後軍繼之而身從間道出梓潼扼歸以俟濟師嗣昌不用賊旣入蜀之巴州人龍兵譟而西歸召良玉兵合擊九檄皆不至十四年正月諸軍追賊開縣之黃陵城參將劉士杰深入所當披靡獻忠登高望見無秦人旗幟而良玉兵前部無鬪志獨士杰孤軍迺密選壯士潛行箐谷中乘高大呼馳下良玉兵先潰總兵猛如虎潰圍出嗣昌方悔不用元吉言而獻忠已席卷出川西絕新開驛置楚蜀消息中斷遂以計給入襄陽城襄王被執嗣昌不食卒賊瀕死復縱迄以亡國者以良玉素驕蹇不用命故也二月詔良玉削職戴罪平賊自贖五月獻忠陷南陽卽攻泌陽破之良玉至南陽賊遁去良玉不戢士泌人脫於賊者遇官軍無噍

類旣而獻忠陷鄖西掠地至信陽屢勝而驕良玉乃從南陽
進兵復大破之降其衆數萬獻忠中股負重傷乘夜遁而是
時李自成方殘襄城圍良玉於偃城幾陷會陝西總督汪喬
年出關自成乃輟圍與喬年戰襄城外喬年軍盡覆良玉不
能救帝旣斬賀人龍以肅軍政專倚良玉辦賊十五年三月
自成復圍開封乃釋故尚書初薦良王者侯恂於獄起爲督
師發帑金十五萬犒良玉營將士激勸之良玉及虎大威楊
德政會師朱仙鎮賊營西官軍營北良玉見賊勢盛一夕拔
營遁羣帥望見皆潰自成戒士卒待良玉兵過從後擊之官
軍幸追者緩疾馳八十里賊已於其前穿塹深廣各二尋環
繞百里自成親帥衆遮於後良玉兵大亂下馬渡溝僵仆溪

谷中趾其顛而過賊從而蹂之軍大敗棄馬騾萬匹器械無
算良玉走襄陽帝聞良玉敗詔恂拒河圖賊而令良玉以兵
來會良玉畏自成遷延不至九月開封以河決而亡帝怒恂
罷其官不能罪良玉也開封旣亡自成無所得遽引兵西謀
拔襄陽爲根本時良玉壁樊城大造戰艦驅襄陽一郡人以
實軍諸降賊附之有衆二十萬然親軍愛將大半死而降人
不奉約束良玉亦漸衰多病不復能與自成角自成乘勝攻
良玉良玉退兵南岸結水寨相持以萬人扼淺洲賊兵十萬
爭渡不能遏良玉乃宵遁引其舟師至武昌從楚王乞二十
萬人餉曰我爲王保境王不應良玉縱兵大掠火光照江中
宗室士民奔竄山谷多爲土寇所害驛傳道王揚基奪門出

良玉兵掠其貲并及其子女自十二月二十四日抵武昌至十六年正月中兵始去居人呼更生良玉既東自成遂陷承天傍掠諸州縣當是時降將叛卒率假左軍號恣剽掠蘄州守將王允成爲亂首破建德劫池陽去蕪湖四十里泊舟三山荻港漕艘鹽船盡奪以載兵聲言諸將寄帑南京請以親信三千人與俱南京諸文武官及操江都御史至陳師江上爲守禦士民一夕數徙商旅不行都御史李邦華被召道湖口草檄告良玉以危詞動之而令安慶巡撫發九江庫銀十五萬兩補六月糧邦華入見帝論良玉潰兵之罪請歸罪於王允成帝乃令良玉誅允成而獎其能定變良玉卒留允成於軍中不誅良玉留安慶久之徐溯九江上聞獻忠破湖廣

沉楚王於江坐視不救八月乃入武昌立軍府令副將吳學禮援袁州江西巡撫郭都賢惡其淫掠檄歸之而自募土人爲戍守會賊陷長沙吉州復陷袁州岳州良玉遣馬進忠援袁州馬士秀援岳州士秀率水師敗賊岳州城下二州遂竝復時帝命兵部侍郎呂大器代侯恂爲總督恂解任中道逮下獄良玉知其爲已故心鞅鞅與大器齟齬賊連陷建昌諸府大器無兵不能救良玉亦不援進忠與賊戰嘉魚再失利良玉軍遂不振會獻忠從荆河入蜀良玉遣兵追之距荊州七十里荆襄諸賊因自成入關盡懈良玉偵知乃遣副將盧光祖上隨棗承德而惠登相自均房劉洪起自南陽犄賊後收其空虛地以自爲功十七年正月詔封良玉爲寧南伯畀

其子夢庚平賊將軍印功成世守武昌命給事中左懋第便道督戰良玉乃條日月進兵狀以聞疏入未奉旨京師被陷福王立晉良玉爲侯廕一子錦衣衛正千戶且竝封黃得功高傑劉澤清劉良佐爲諸鎮俱廕子世襲而以上流之事專委良玉尋加太子太傅時李自成敗於關門良玉得以其間稍復楚西境之荊州德安承天而湖廣巡撫何騰蛟及總督袁繼咸居江西皆與良玉善南都倚爲屏蔽良玉兵數十萬號百萬前五營爲親軍後五營爲降軍每春秋肄兵武昌諸山一山幟一色山谷爲滿軍法用兩人夾馬馳曰過對馬足動地殷如雷聲聞數里諸鎮兵惟高傑最強不及良玉遠甚然良玉自朱仙鎮之敗精銳略盡其後歸者多烏合軍容雖

壯法令不復相懾且老病無中原意矣良玉之起由侯恂恂故東林也馬士英阮大鍼用事慮東林倚良玉爲難謾語修好而陰忌之會監軍御史黃澍挾良玉勢面觸馬阮既返遣緹騎逮澍良玉留澍不遣澍與諸將日以清君側爲請亡何有北來太子事澍借此激衆以報已怨召三十六營大將與之盟良玉反意乃決傳檄討馬士英自漢口達蘄州列舟二百餘里良玉疾已劇至九江邀總督袁繼咸入舟中袖中出密諭云自皇太子劫諸將盟繼咸正辭拒之部將郝效忠陰入城縱火殘其城而去是夜良玉死時
順治二年四月也諸將推其子夢庚爲留後軍東下朝命黃得功渡江防勦時

大清兵已下泗州逼儀真矣夢庚遂偕澍以衆降於九江鄧
玘四川人天啓初從軍積功得守備安邦彥反玘追賊織金
勇冠諸將已敗績河濱魯欽敗歿賊犯威清玘夜斫營走賊
進都司僉書討敗苗曾李阿二自貴州用兵裨將楊明楷劉
志敏張雲鵬竝驍勇不得爲大將惟玘以功名聞崇禎初屢
遷四川副總兵與侯良桂共斬安邦彥京師有警率六千人
勤王共復遵永四城加署都督僉事世廕千戶尋擢總兵官
鎮守遵化戰喜峰口及洪山竝有功進秩爲眞五年春叛將
亂登萊王洪等無功玘自請行命爲援勦總兵官與洪及劉
國柱禦賊沙河戰相當已而遁走賊乘之大敗尋與諸將金
國奇等復登萊二城錄功進署都督同知玘戍遵化久思歸

及登萊事竣復以爲言會賊入河北言者請令玘勦玘怏怏
而行給事中范淑泰劾玘虐民帝不問旋遣近侍監其軍玘
至濟源射殺王自用於善陽山卽賊紫金梁也頃之走賊礮
川拒却之彭城鎮與左良玉擊賊清池柳莊賊走林縣而玘
部將楊遇春邀賊中伏死賊用其旗并誘殺他將自是輕玘
俄與良玉逐賊沙河賊圍湯陰玘被困上樵窩良玉救乃免
已共破賊官村沁河清池萬善移師畿南敗賊白草關賊犯
平山敗之紅子店馬種川賊遁青石嶺敗之紅澗村醉漢口
賊犯臨城敗之魚桂嶺當是時賊蔓河朔及畿南天子特遣
倪寵王樸將京軍而保定梁甫河南左良玉湯九州合玘軍
足殄賊羣帥勢相軋彼此觀望託山深道岐以自解莫利先

入賊遂由澠池南渡而諸帥各有近侍為中軍事易掩飾所報功多不以實也十一月賊南遁玘追敗之澠池扣子山至宜陽盧氏而還是月以玘為保定總兵官代梁甫七年正月以賊盡入鄖襄命玘援勦解南漳圍尋敗賊胡地冲斬關天王九條龍草上飛抓山虎雙翼虎勦房縣竹山南漳賊戰獅子崖石漳山斬一隻虎滿天飛已擊賊洵陽也家溝連戰皆捷獲首功一千有奇八月敘五峰山破賊功進右都督玘不善馭軍軍心亦不附諜於鄖西玘渡河以避之總督陳奇瑜犒慰乃定奇瑜集諸將討竹山竹溪諸賊玘頻有功十一月賊大入河南命玘援勦八年春賊陷新蔡知縣王信罵賊死玘追敗賊羅山是時賊陷鳳陽命玘自黃州速援安慶及桐

城被圍玘竟不至御史錢守廉劾玘勦賊羅山殺良冒功命總督洪承疇核之四月承疇至汝州令玘戍樊城防漢江是月部將王允成以尅餉鼓譟殺其二僕玘懼登樓越牆墮地死玘由小校大小數百戰所向克捷以久戍缺望恣其下淫掠大學士王應熊以鄉里庇之玘益無所憚其死也人以為逸罰云賀人龍米脂人初以守備隸延綏巡撫洪承疇麾下崇禎四年承疇受賊降命人龍勞以酒伏兵擊斬賊三百二十人其冬張福臻代承疇遣人龍勦賊党雄斬獲二百有奇明年夏從福臻禽賊孫守法其秋以所部援勦山西六年春與總兵尤世祿復遼州已敗賊垣曲絳縣進都司僉書又連破賊水頭鎮花池塞湯湖村會山西賊幾盡乃還陝西從巡

撫陳奇瑜討平延川賊俘斬一千有奇奇瑜擢總督以人龍
自隨七年四月擊賊隰州禽尅天虎進參將奇瑜追賊鄖襄
與漢人龍並有功賊佚車箱峽陷隴州西去奇瑜遣人龍救
之甫入隴州李自成復至環攻以人龍同里開遣其將高傑
移書令反人龍不報固守兩月左光先救至圍始解十二月
敗賊中莊明年正月鳳陽陷總督洪承疇遣人龍馳救敗賊
睢州進副總兵承疇以陝西急率人龍入關商洛賊馬光玉
等薄西安距大軍五十里承疇命人龍入子午谷邀賊之南
別將劉成功王永祥邀賊之北張全昌從咸陽繞與平東賊
以此不敢南遁盡走武功扶風又渡渭走郿縣承疇追至王
渠鎮賊方掠南山人龍成功等與戰追奔三十里至大泥峪

賊棄馬登山走七月高迎祥張獻忠掠泰安清水人龍偕全
昌破之張家川已而失利都司田應龍等死八月高傑降承
疇令人龍及游擊孫守法挾之趨富平乘夜擊敗賊人龍尋
移守延綏九年七月從巡撫孫傳庭大破賊盤屋禽迎祥九
月惠登相等屯寶雞承疇遣人龍等往擊戰於賈家村追奔
爲賊所截川將曾榮耀等來援敗去人龍坐褫官立功十年
小紅狼圍漢中瑞王告急承疇率人龍兵由兩當趨救賊解
去詔復人龍官徽秦逸賊東趨平鳳人龍躡至柳林不利賊
窺西安人龍禦之斬獲多其冬自成登相入四川承疇率人
龍等往援歲暮至廣元賊已逼成都自成別由松潘還陝右
十一年承疇督人龍等自階文窮追自成走入西羌界人龍

與曹變蛟等大戰二十七日自成引殘卒入塞竄山中謀入四川爲人龍及馬科所追突漢中扼於左光先其黨祈總管降自成幾滅詳變蛟傳其冬京師戒嚴擢人龍總兵官帥師入衛人龍所部多降賊至山西而謀尋撫定抵京與變蛟等奏捷於太平明年事定還陝西其秋張獻忠羅汝才叛謀入陝人龍及副將李國奇等扼之興安乃入川東楊嗣昌檄陝西總督鄭崇儉率人龍國奇軍會勦十二月人龍擊賊大敗之十三年二月與左良玉大破賊瑪瑙山人龍得一千三百餘級降賊將二十五人六月汝才登相犯開縣總兵鄭嘉棟擊之仙寺嶺人龍擊之馬弱溪共斬首一千二百汝才登相東西走追之不能及時賊盡集於川監軍萬元吉令川將守

巴巫諸隘人龍國奇及楚將張應元汪雲龍張奏凱專主追擊及應元軍入夔營土地嶺人龍逗遛不至諸軍遂大敗人龍竟還陝已而獻忠汝才陷劍州趨廣元將從問道入漢中人龍拒之陽平百丈二關賊乃退十二月嗣昌至重慶三檄人龍會師不至初嗣昌惡左良玉許人龍代爲平賊將軍及戰瑪瑙山良玉功第一嗣昌語人龍姑待之人龍大失望劾良玉所爲不奉約束嗣昌亦不能制賊陷瀘州而北人龍屯小市廂隔一水不擊賊遂越成都走漢州德陽人龍軍大譟而歸十四年三月嗣昌卒丁啓睿代令人龍國奇出當陽擊敗自成於靈寶山中人龍子大明戰歿九月總督傅宗龍統人龍國奇軍出關次新蔡遇賊孟家莊將戰人龍先走國奇

戰不勝亦走宗龍遂歿十五年正月總督汪喬年出關擊賊人龍及鄭嘉棟牛成虎從至襄城遇賊復不戰走喬年亦歿帝大怒欲誅之慮其為變姑奪職戴罪視事及孫傳庭督師陝西帝授以意人龍駐咸陽虞禍曉夜為備傳庭以人龍家米脂其宗族多在賊中未可輕發在道佯上疏曰人龍臣舊將願貫其罪俾從臣自効帝亦佯許之人龍稍自安傳庭至陝密與巡撫張爾忠謀以五月朔召人龍計事數其罪斬之其部將周國卿將精卒二百人與同黨魏大亨賀國賢高進庫等將逃還涇陽取其孥與帑為亂爾忠遣參將孫守法先入涇陽質其妻子國卿窮謀斬大亨等以降爾忠密聞之大亨遂斬國卿函送其首他部將高傑高汝利賀勇董學禮等

十四人俱仍故官一軍乃定

黃得功號虎山開原衛人其先自合肥徙早孤與母徐居少負奇氣膽畧過人年十二母釀酒熟竊飲至盡母責之笑曰償易耳時遼事急得功持刀雜行伍中出斬首二級中賞率得白金五十兩歸奉母曰兒以償酒也由是隸經畧為親軍累功至遊擊崇禎九年遷副總兵分管京衛營十一年以禁軍從總督熊文燦擊賊於舞陽鏖光固間最八月又從擊賊馬光玉於浙川之吳村王家寨大破之詔加太子太師署總兵銜十三年從太監盧九德破賊於板石阪賊革裏眼等五管降十四年以總兵與王憲分駐鳳陽泗州護陵張獻忠攻桐城挾營將廖應登至城下誘降得功與劉良佐合兵擊之

於鮑家嶺賊敗遁追至潛山擒斬賊將闖世王馬武三鷄子
王興國三鷄子獻忠養子最號驍勇者也得功箭傷面愈自
奮與賊轉戰十餘日所殺傷獨多明年移鎮廬州十七年封
靖南伯福王立江南進封侯旋命與劉良佐劉澤清高傑爲
四鎮初督輔史可法慮傑跋扈難制故置得功儀真陰相牽
制適登萊總兵黃蜚將之任蜚與得功同姓稱兄弟移書請
兵備非常得功率騎三百由揚州往高郵迎之傑副將胡茂
楨馳報傑倏素忌得功又疑圖已乃伏精卒道中邀擊之得
功行至土橋方作食伏起出不意上馬舉鐵鞭飛矢雨集馬
踣騰他騎馳有驍騎舞槊直前得功大呼反鬪挾其槊而扶
之人馬皆糜復殺數十人跳入頽垣中哮聲如雷追者不敢

進遂疾馳至大軍得免方鬪時傑潛師擣儀真得功兵頗傷
而所俱行三百騎皆沒遂訴於朝願與傑決一死戰可法命
監軍萬元吉和解之不可會得功有母喪可法來弔語之曰
土橋之役無智愚皆知傑不義今將軍以國故捐盛怒而歸
曲於高是將軍收大名於天下也得功色稍和終以所殺囚
多爲恨可法令傑贖其馬復出千金爲母賄得功不得已聽
之明年傑欲趨河南規取中原詔得功與劉良佐守邳徐傑
死得功還儀真傑家并將士妻子尚留揚州得功謀襲之朝
廷亟遣盧九德諭止得功遂移鎮廬州四月左良玉東下以
清君側爲名至九江病死軍中立其子夢庚命得功趨上江
禦之駐師荻港得功破夢庚兵於銅陵解其圍命移家鎮太

平一意辦賊論功加左柱國時

大清兵已渡江知福王奔分兵襲太平得功方收兵屯蕪湖福王潛入其營得功驚泣曰陛下死守京城臣等猶可盡力奈何聽奸人言倉卒至此且臣方對敵安能扈駕王曰非卿無可仗者得功泣曰願效死得功戰荻港時傷臂幾墮衣葛衣以帛絡臂佩刀坐小舟督麾下八總兵結束前迎敵而劉良佐已先歸命大呼岸上招降得功怒叱曰汝乃降乎忽飛矢至中其喉偏左得功知不可為擲刀拾所拔箭刺吭死其妻聞之亦自經總兵翁之琪投江死中軍田雄遂挾福王降得功粗猛不識文義江南初立主詔書指揮多出羣小得功得詔紙或對使罵裂之然忠義出天性聞以國事相規誠者

輒屈已改不旋踵北來太子之獄得功抗疏爭曰東宮未必假冒先帝子卽上子未有了無證明混然雷同者臣恐在廷諸臣諂徇者多抗顏者少卽明白識認亦不敢抗詞取禍矣時太子真偽莫敢決而得功忠憤不阿如此得功每戰飲酒數斗酒酣氣益厲喜持鐵鞭戰鞭漬血沾手腕以水需之久乃得脫軍中呼爲黃鬪子始爲偏裨隨大帥立功名未嘗一當大敵及專鎮封侯不及一年餘而南北轉徙王逃將潰無所一用其力束手就殲與國俱亾而已其軍行紀律嚴下無敢犯所至人感其德廬州桐城定遠皆爲立生祠葬儀真方山母墓側

高傑米脂人與李自成同邑同起爲盜崇禎七年閏八月總

督陳奇瑜遣參將賀人龍救隴州被圍大困自成令傑遺書約人龍反不報使者歸先見傑後見自成比圍城兩月不拔自成心疑傑遣別部將往代傑歸守營自成妻邢氏趨武多智掌軍資每日支糧仗傑輒過氏營分合符驗氏偉傑貌與之通恐自成覺謀歸降次年八月遂竊邢氏來歸洪承疇以付人龍使其遊擊孫守法挾以破賊取立效爲信自是傑常隸人龍麾下十三年張獻忠敗於瑪瑙山竄興歸界上傑隨人龍及副將李國奇大敗之鹽井十五年人龍以罪誅命傑爲實授遊擊十月陝西總督孫傳庭至南陽自成與羅汝才西行逆之傳庭以傑與魯某爲先鋒遇於塚頭大戰敗賊追奔六十里汝才見自成敗來救遶出官軍後後軍左勦望見

賊怖而先奔衆軍皆奔遂大潰傑所亡失獨少十六年進副總兵與總兵白廣恩爲軍鋒兩人皆降將也廣恩鷙鷙素不奉約束而傑尤凶暴朝廷以傑爲自成所切齒故命隸傳庭辦賊九月從傳庭克寶豐復邠縣時官軍乘勝深入乏食降將李際遇通賊自成帥精騎大至傳庭問計於諸將傑請戰廣恩不可傳庭以廣恩爲怯廣恩不懌引所部遁去官軍接戰陷伏中傑登嶺上望之曰不可支矣亦麾衆退軍遂大奔死者數萬廣恩走汝州不救傑乃隨傳庭走河北已而自山西渡河轉入潼關廣恩已先至十一月自成攻關廣恩力戰而傑怨廣恩以寶豐之敗不救已亦擁衆不肯救廣恩戰敗關遂破傳庭被殺自成破西安據之傑北走延安賊將李過

追傑傑東走宜川河冰適合遂渡入蒲津以守賊至冰解不得渡乃免廣恩既敗走固原爲賊將追及遂以城降十七年進傑總兵帝令總督李化熙率傑兵馳救山西而蒲州平陽已陷久傑退至澤州沿途大掠賊遂薄太原京師陷傑南走福王封傑興平伯列於四鎮領揚州駐城外傑固欲入城揚州民畏傑不納傑攻城急日掠廂村婦女民益惡之知府馬鳴騷推官湯來賀堅守月餘傑知不可攻意稍怠閣部史可法議以瓜州予傑乃止九月命傑移駐徐州以左中允衛胤文兼兵科給事中監其軍西討徐州土賊程繼孔被擒至京師乘李自成亂逃歸十二月傑擒斬之加太子少傅廕一子世襲錦衣僉事初傑伏兵要擊黃得功於土橋得功幾不免

兩鎮遂相仇怨事見得功傳傑爭揚州時可法頗爲所窘至是傑感可法忠與謀恢復議得功與劉澤清二鎮赴邳宿防河傑自提兵直趨歸開且瞰宛洛荆襄以爲根本遂具疏上之語激切且云得功與臣猶介介前事臣知報君雪恥而已安能與同列較短長哉然得功終不欲爲傑後勁而澤清尤狡橫難任可法不得已調劉良佐赴徐與傑相聲援順治二年正月傑抵歸德總兵許定國方駐睢州有言其送子渡河者傑招定國來會不應復邀巡撫越其杰巡按陳潛夫同往睢州定國始郊逆其杰諷傑勿入城傑心輕定國不聽遂入城十一日定國置酒享傑傑飲酣爲定國刻行期且微及送子事定國益疑無離睢意傑固促之行定國怒夜伏

兵傳砲大呼其杰等亟遁走傑醉臥帳中未起衆擁至定國所殺之先是傑以定國將去睢盡發兵戍開封所留親卒數十人而已定國僞恭順多選妓侍傑而以二妓偶一卒寢卒盡醉及聞砲欲起爲二妓所掣不得脫皆死明日傑部下至攻城老弱無孑遺定國走降

大清軍傑爲人淫毒揚民間其死皆相賀然是行也進取意甚銳故時有惜之者始朝廷許諸鎮與聞國是故傑屢條奏救降賊者及請釋武愷於獄不允復疏薦吳牲鄭三俊金光辰姜埰熊開元金聲沈正宗等大抵其時武臣風尚多類此傑死贈太子太保以其子元爵襲興平伯劉澤清曹縣人以將朴授遼東寧前衛守備遷山東都司僉書加參將崇禎三

年

大清兵攻鐵廠欲據以絕豐潤糧道援守三屯總兵楊肇基遣澤清來援未至鐵廠一十五里遇

大兵力戰自辰至午不決得濟師轉戰至遵化夾擊遂得入城叙功加二級至副總兵五年以侵尅軍糧被劾詔立功衝要地六年遷總兵其冬加左都督恢復登州有功八年詔統山東兵防漕九年京師戒嚴統兵入衛令駐新城爲南北控扼復命留守通州加左都督太子太師十三年五月山東大饑民相聚爲寇曹濮尤甚帝命澤清會總兵楊御蕃兵勦捕之八月降右都督鎮守山東防海澤清以生長山東久鎮東省非宜請辭任帝令整旅渡河合諸鎮星馳援勦十六年二

月賊圍開封久澤清赴援以朱家寨去汴八里提五千人南渡倚河爲寨疏水環之欲以次結八寨達大堤築甬道饋饌城中壁壘未成賊來爭相持三日互有殺傷澤清卽命拔營去惶擾奔迸士爭舟多溺死者澤清爲人性恇怯懷私觀望嘗妄報大捷邀賞賜又詭稱墮馬被傷詔賚藥資四十兩命赴保定勦賊不從日大掠臨清率兵南下所至焚劫一空寇氛日急給事中韓如愈馬嘉植皆謀奉使南歸如愈常劾澤清過東昌澤清遣人殺之於道無敢上聞者京師陷澤清走南都福王以爲諸鎮之一封東平伯駐廬州時武臣各占分地賦入不以上供恣其所用置封疆兵事一切不問與廷臣互分黨援干預朝政排擠異己奏牘紛如紀綱盡裂而澤清

所言尤狂悖王初立即援靖康故事請以今歲五月改元又請宥故輔周延儒助餉賊銀都御史劉宗周劾諸鎮跋扈狀澤清遂兩疏劾宗周且曰上若誅宗周臣卽卸職惟皇上賜劍朝廷不得已溫詔解之又請禁巡按不得拿訪追賊請法司嚴緝故總督侯恂及其子方夏朝廷皆曲意從之
順治二年四月揚州告急命澤清等往援而澤清已潛謀輸款矣

大清惡其反覆磔誅之澤清頗涉文藝好吟咏嘗召客飲酒唱和幕中蓄兩猿以名呼之卽至一日宴其故人子酌酒金甌中甌可容三升許呼猿捧酒跪送客猿猙獰甚客戰掉遂巡不敢取澤清笑曰君怖耶命取囚撲死堦下剗其腦及心

肝置甌中和酒付猿捧之前飲醕顏色自若其竟恐多此類諸鎮皆係福王存亡劉良佐受職本朝故不立傳

劉肇基字鼎維遼東人嗣世職指揮僉事遷都司僉書隸山海總兵官尤世威麾下崇禎七年從世威援宣府又從征中原賊進遊擊戍雒南蘭草川明年遇賊戰敗傷臂未幾世威罷肇基及遊擊羅岱分將其兵與祖寬大破賊汝州斬首千六百有奇後從寬數有功而其部下皆邊軍久戍思歸與寬軍謀而走總理盧象昇乃遣之入秦其秋畿輔有警始還山海竟坐前罪解職令從征自効俄以固守永平功復職屢遷遼東副總兵十二年冬薊遼總督洪承疇請用爲署總兵官

分練寧遠諸營卒兵部尚書傅宗龍稍持之帝怒下宗龍獄擢肇基都督僉事任之明年三月錦州有警承疇命吳三桂偕肇基赴松山爲聲援三桂困松杏間肇基救出之喪士卒千人七月與曹變蛟等戰黃土臺及松山杏山九月復戰杏山肇基軍稍却承疇甄別諸將解肇基職代以王廷臣十七年春加都督同知提督南京大教場及福王立史可法督師淮揚肇基請從征自効屢加左都督太子太保可法議分布諸將奏薦李成棟賀大成王之綱李本身胡茂楨爲總兵官成棟鎮徐州大成揚州之綱開封本身茂楨隸高傑麾下爲前鋒而令肇基駐高家集李棲鳳駐睢寧以防河棲鳳本甘肅總兵以地失留淮揚間也閣標前鋒則用張天祿駐瓜洲

十一月肇基棲鳳以可法命謀取宿遷初八日渡河復其城
越數日

大清兵圍邳州軍城北肇基等軍城南相持半月

大清兵引去

順治二年三月

大清兵抵揚州可法邀諸將赴援獨肇基自白洋河趨赴過
高郵不見妻子既入城請乘

大清兵未集背城一戰可法持重肇基乃分守北門發砲傷
圍者已而城破率所部四百人巷戰格殺數百人力不支一
軍皆沒副將乙邦才馬應魁莊子固等皆同死邦才青州人
崇禎中以隊長擊賊於河南江北間大將黃得功與賊戰霍

山單騎逐賊陷淖中賊圍而射之馬斃得功徒步關天將暮
僅餘二矢邦才大呼衝賊走得功乃得出邦才授以已馬分
矢與之且走且射殪追騎十餘人始得及其軍得功自是知
邦才時有張衡者亦以驍敢名賊圍六安急總督馬士英救
之甫至斥其左右副將而號於軍中曰孰爲乙邦才張衡者
兩人入謁卽牒補副將以其兵授之曰爲我入六安取知州
狀來報兩人出卽簡精騎二百夜衝賊陣而入遶城大呼曰
大軍至矣固守勿懈城中人喜守益堅兩人促知州署狀復
奪圍出不損一騎時穎壽六安霍山諸州縣數被寇邦才大
小十餘戰咸有功及可法鎮揚州攜之行至是戰敗自刎死
應魁字守卿貴池人初爲小將率家丁五十人巡村落間猝

遇賊衆懼欲奔應魁大聲曰勿怖死死命也連發二矢殪二賊賊卽退可法因拔爲副總兵俾領旗鼓每戰披白甲大書盡忠報國四字於背竟巷戰死子固字憲伯遼東人年十三殺人亡命後從軍有功積官至參將嘗從山西總兵許定國救開封軍半道謀歸定國獲罪子固輯餘衆得免議後可法出鎮用爲副總兵俾與屯於徐州歸德間子固募壯士七百人以赤心報國爲號聞揚州被圍率衆馳救三日而至城將破欲擁可法出城遇

大清兵格鬪死他若副將樓挺江雲龍李豫副旗鼓參將陶國祚內左營參將許謹內右營參將馮國用內前營參將陳光玉參將李隆徐純仁遊擊李大忠孫開忠及都司姚懷龍等十餘人皆以巷戰死

明史藁

列傳第一百五十二

光祿大夫 經筵講官明史總裁戶部尚書加七級臣王鴻緒奏

敕編撰

張國維

朱大典

王道焜等

張肯堂

李向中等

曾

櫻

揭重熙
傅鼎銓

陳潛夫

陸培

林汝翥

林奎

王瑞栴

余煌

沈廷揚

朱繼祚

湯芬等

張國維字玉笥東陽人天啓二年進士授番禺知縣崇禎元年擢刑科給事中劾罷副都御史楊所修御史田景新皆魏忠賢黨也御史胡良機給事中陶崇道等六人先為忠賢所逐及起用顧置之外國維以為言六人乃復留已陳時政五

事言陛下求治太銳綜核太嚴拙者跼踖以避咎巧者委蛇以取容誰能展布四體爲國家營職業者故治象精明而腹心手足之誼實薄此英察宜斂也祖宗朝閣臣有封還詔旨者有疏揭屢上而爭一事者今一奉詰責則俛首不遑一承改擬則順旨恐後倘處置失宜亦必不敢執奏此將順宜戒也召對本以通下情未有因而獲罪者今則惟傳天語莫睹拜颺臣同官熊奮渭還朝十日旁措一詞遂蒙譴謫不可稍加薄罰示優容之度乎此上下宜洽也其二條請平刑罰溥膏澤帝不能盡用進禮科都給事中京師地震規弊政甚切遷太常少卿七年擢右僉都御史巡撫應天安慶等十府其冬流賊犯桐城官軍覆沒國維方壯年一夕鬚髮頓白明年

正月率副將許自強赴援遊擊潘可大知縣陳爾銘守桐不下賊乃攻潛山知縣趙士彥重傷卒攻太湖知縣金應元訓導扈永寧被殺國維至解桐圍遣守備朱士肩趨潛山把總張其威趨太湖士肩戰死自強遇賊宿松殺傷相當安慶山民桀石以投賊賊多死乃越英山霍山而遁九月賊復由宿松入潛山太湖他賊掃地王亦陷宿松等三縣國維乃募土著二千人戍之而以兵事屬監軍史可法明年正月賊圍江浦遣守備蔣若來陳于王戰却之十二月賊分兵犯懷寧可法及左良玉馬爌過之復犯江浦副將程龍及若來于王等拒守諸城竝全賊又圍望江遣兵援之亦解去十年三月國維率龍等赴安慶禦賊鄧家店龍軍數千悉歿賊東陷和州

舍山定遠攻陷六合知縣鄭同元潰走賊遂攻天長國維見賊勢日熾請於朝割安慶池州太平別設巡撫以可法任之安慶不隸江南巡撫自此始也議者欲并割江浦六合俾國維專護江南不許國維爲人寬惠得士大夫心屬郡災傷輒爲請命多獲寬減奸民張漢儒訐錢謙益瞿式耜陸文聲訐張溥張采國維斥漢儒等誣罔忤執政溫體仁奪俸蘇州去任推官周之夔希體仁指復訐溥等國維亦力白其誣築太湖繁昌二城建蘇州九里石塘及平望內外塘長洲至和等塘修松江捍海堤濬鎮江及江陰漕渠並有成績居六年遷工部右侍郎兼右僉都御史總理河道歲大旱漕流涸國維濬諸水以通漕山東饑賑活貧民無算十四年夏山東盜起

改兵部右侍郎兼督淮徐臨通四鎮兵護漕運大盜李青山衆數萬據梁山濼遣其黨分據韓莊等八閘運道爲梗周延儒赴召北上青山謁之言率衆護漕非亂也延儒許言於朝授以職而青山竟截漕舟大焚掠迫臨清中官劉元斌走國維合所部兵擊降之獻俘於朝帝率太子二王御午門磔諸市兵部尚書陳新甲下獄帝難其代以侍郎馮元飈攝旣乃召國維代之召見德政殿慰勞甚至乃定戰守賞罰格列上覈世職酌推陞愼咨題等七事帝皆報可會開封陷河北震動條防河數策帝亦納之時外吏考選者皆欲得給事而帝以巡方任重將槩注御史首輔周延儒令國維薦時敏等十人察外郡城守以旣有巡按不可復遣御史遂竝授給事

獨御史蔣拱辰不與有怨言及出監趙光抃軍謂國維害已
抵昌平卽疏劾國維國維言拱辰挾怨誣詆拱辰再劾國維
溺職請如丁汝夔陳新甲故事正失陷名藩之罪御史趙謨
右拱辰言國維忠諒有餘擔當不足不能攬羣才惟任胥吏
國維再疏求斥不許十六年四月我

大清兵猶在畿內國維檄趙光抃拒螺山八總兵之師皆潰
言者益詆國維帝乃令解職復以附會延儒及螺山喪師事
遽下獄蘇州民間之爭詣闕乞貸帝念其治河功十七年二
月俾出獄候命三月召對中左門復故官兼右僉都御史馳
赴江南浙江督練兵輸餉諸務國維條上生財七事卽馳出
都行十日而都城陷福王召之令協理戎政尋敘山東討賊

功加太子太保廕錦衣僉事吏部尙書徐石麒去位衆議歸
國維馬士英惡之用張捷國維乃乞省親歸南都失守踰月
潞王監國於杭州不數日出降閏六月國維朝魯王以海於
台州請王監國卽日移駐紹興進國維少傅兼太子太傅兵
部尙書武英殿大學士督師江上總兵官方國安亦自金華
至馬士英素善國安匿其軍中請入朝國維劾其十大罪乃
不敢入連復富陽於潛樹木城緣江要害聯合國安及王之
仁鄭遵謙熊汝霖孫嘉績錢肅樂諸營爲持久計
順治三年五月國安等諸軍乏餉潰王走台州航海國維亦
還守東陽六月知勢不可支作絕命詩三章赴水死年五十
有二

朱大典字延之金華人家世貧賤大典始讀書爲人豪邁舉萬曆四十四年進士除章丘知縣天啓二年擢兵科給事中中官王體乾魏忠賢等十二人及乳嫗客氏假保護功所廢錦衣許世襲大典抗疏力諫五年由左給事中出爲福建副使進右參政以憂歸崇禎三年起故官蒞山東尋調天津五年四月李九成孔有德圍萊州山東巡撫徐從治中砲死擢大典右僉都御史代之詔駐青州調度兵食至七月登萊巡撫謝璉復陷於賊總督劉宇烈被逮乃罷總督及登萊巡撫不設專任大典督主客兵數萬及關外勁旅四千八百餘人合勦之以總兵金國奇將率副將靳國臣劉邦域參將祖大弼祖寬張韜游擊柏永福及故總兵吳襄襄子三桂等以中

官高起潛監護軍餉抵德州賊復犯平度副將牟文綬何維忠等救之殺賊魁陳有時維忠亦被殺八月巡按監軍御史謝三賓至昌邑請斬逃帥王洪劉國柱詔逮治之兵部尙書熊明遇亦坐主撫悞國罷去三賓復抗疏請絕口勿言撫事國奇等至昌邑分三路國奇等關外兵爲前鋒鄧垹步兵繼之從中路灰埠進昌平總兵陳洪範副將劉澤清方登化從南路平度進參將王之富王文緯等從北路海廟進檄游擊徐元亨等率萊陽師來會以牟文綬守新河諸軍皆攜三日糧盡抵新河東岸亂流以濟祖寬至沙河有德迎戰寬先進靳國臣繼之賊大敗諸軍乘勝追至城下賊夜半東遁圍始解守者疑賊誘砲拒之起潛遣中使入諭闔城相慶明日南

路兵始至先是有時被殺九成等令招遠黃縣及海濱居民備土囊二十萬尅日積城下履之登城先期一日而敗國奇等遂擊賊黃縣斬首萬三千俘八百逃散及墜海死者數萬賊竄歸登州國臣等築長圍守之城三面距山一面距海牆三十里而遙東西俱抵海分番戍賊不能出發大砲官軍多死傷李九成出戰相當十一月九成搏戰降者洩其謀官軍合擊之馘於陣賊渠魁五九成有德耿仲明有時毛承祿也及是殺其二帝嘉解圍功進大典右副都御史將吏陞賞有差是月國奇卒以襄代攻圍既久乃射書城中令馬驄出議事驄故參將陷於賊嘗參賊密謀欲驄知而生心且使賊自疑也驄果遣使報密與被掠副將龔正祥陷賊舊將岳永陞

等十六人歃血爲內應六年正月朔事洩賊執斬之賊糧絕食人熬人油爲燭恃水城可走不降及王之富祖寬奪其水門外護牆賊大懼二月中旬有德先遁載子女財帛出海仲明以水城委副將王秉忠已亦以單舸遁官軍遂入大城攻水城未下遊擊劉良佐獻轟城策匿人永福寺中穴城置火藥發之城崩官軍入賊退保蓬萊閣大典招降始釋甲俘千餘人獲秉忠及僞將七十五人自縊及投海死者不可勝計賊盡平有德等走旅順島帥黃龍邀擊生擒其黨毛承祿陳光福蘇有功斬李應元惟有德仲明逸去乃獻承祿等於朝磔之先一日有功脫械走帝震怒斬監守官刑部郎多獲罪永幾被執伏誅敘功進大典兵部右侍郎世蔭錦衣百戶巡

撫如故八年二月流賊陷鳳陽毀皇陵總督楊一鵬被逮詔
大典總督漕運兼巡撫廬鳳淮揚四郡移鎮鳳陽時江北州
縣多陷明年正月李自成等圍滁州連營百餘里總兵祖寬
大破之大典會總理盧象昇追襲復破之賊乃引而北再窺
鳳陽大典急還兵遏賊參將鮑釗力戰賊始退十一年賊復
入江北大典提兵逼之賊謀竄茶山大典與安慶巡撫史可
法遏之賊乃西遁大典先坐失州縣貶秩視事是年四月以
平賊踰期總督洪承疇以下俱論罪大典再貶三秩賊趨潁
川復爲大典所却尋敘援勦及轉漕功盡復其秩十三年河
南賊大入湖廣大典遣將救援屢有功進左侍郎明年六月
以寇患益棘命大典總督江北及河南湖廣軍務仍鎮鳳陽

專辦流賊而以可法代督漕運賊帥袁時中衆數萬橫潁亳
間大典率總兵劉良佐等擊破之敘賚有差大典在事七載
有保障功然不能持廉屢爲給事中方士亮章正宸沈迅御
史鄭崑貞忻城伯趙之龍等所劾詔削籍候勘事未竟而東
陽許都事發許都者諸生豪俠負氣憤縣令苛斂作亂圍金
華大典子萬化募健兒禦之後賊平所募者不散大典聞急
馳歸知縣徐調元閱都兵籍有萬化名言大典縱子交賊巡
按御史左光先聞於朝得旨逮治籍其家充餉且令督賦給
事中韓如愈趣之已而京師陷福王立劉宗周輩勸其召募
勤王給事中熊汝霖請以充爲事官用之北方吏部尙書徐
石麒等覆如其奏請令巡撫河南有詔詰問石麒言河南殘

疆令自練勁旅所費不貲非優之也竟不許已而誠意伯烈孔昭兵部侍郎徐人龍等白其縱子交賊之誣而大典亦自結於馬士英阮大鍼乃召爲兵部左侍郎踰月進尙書總督上江軍務左良玉與兵命監黃得功軍禦之福王奔太平大典與大鍼入見舟中誓力戰得功死王亦被擒兩人遂走杭州會潞王亦降大典乃還鄉郡據城固守唐王聞就加東閣大學士督師浙東踰年城破闔門死之其時浙東西郡縣前後失而死事者杭州則有同知王道焜紹興則有兵部主事高岱葉汝菴衢州則有巡按王景亮知府伍經正推官鄧巖忠鎮將張鵬翼江山知縣方召台州則有禮部侍郎陳函輝若夫布衣徇義會稽潘集周卜年山陰朱瑋諸生徇義諸暨

傅日炯鄞縣趙景麟浦江張君正瑞安鄒欽堯永嘉鄒之琦其尤著者云道焜字昭平錢塘人父國柱舉人兗州同知道焜以天啓元年舉於鄉崇禎時歷福寧州學正南平知縣以薦遷南雄同知會光澤寇發其父老言非道焜不能平撫按爲請詔改邵武同知知光澤縣事撫勦兼施部內底定莊烈帝破格求賢盡徵天下賢能吏撫按以道焜名聞吏部言同知不當與考選擬授職方主事道焜不平抗疏言御史王孫蕃由知州改授知州同知秩皆五品知州可改同知獨不可改乎疏奏溫旨令候考方待命都城陷遂微服南還及杭州不守道焜慨然謂其子均曰世受國恩死固分也遂投繯死岱字魯瞻會稽人崇禎中以武學生舉順天鄉試被黜久之

辨復魯王監國授職方主事及紹興失守卽絕粒祈死子諸生朗坐守之閱八日朗泣拜父前曰兒請先之乃攜巾服泛小舟給舟子出海禱神去岸遠北面再拜躍入海中舟子急挽之齧舟子臂始得下舟子又入水救之捽其中朗躍出水面正巾而沒岱聞之曰兒果能先我乎自是不復言數日亦卒汝菴字衡生岱同邑人由舉人爲兵部主事聞變與妻王氏出居桐塢墓所竝赴水死王被救次日復死之景亮字武侯吳江人崇禎末成進士福王時爲中書舍人唐王立擢御史巡按金衢二府兼視學政經正安福貢生爲西安知縣唐王立超擢知府事巖忠江陵人由鄉舉爲推官衢州破經正赴井死景亮巖忠皆自縊死鵬翼魯王所遣鎮將亦死之召

宣城諸生署江山縣事金華被屠集父老告之曰兵且至吾義不當去然不可以一人故致闔城被殃若輩可迎附遂封其印冠帶北向拜赴井死士民爲收葬立祠祀焉函輝字木叔台州臨海人崇禎七年進士授靖江知縣御史左光先劾罷之後大計復坐贓削籍李自成陷京師慟哭刑牲誓衆倡義師會福王立不許草澤勤王乃已尋起職方主事監軍江北事敗奔歸與擁戴魯王王監國擢少詹事或言函輝昔被計典不宜侍左右遂棄官歸尋復以爲禮部右侍郎王自台州航海函輝從之已而相失哭入雲峰山作絕命詞六言十章投水死集字子翔聞同里王毓著先劉宗周徇義死爲文祭之袖二石及所著詩文自沈渡東橋下卞年字定夫聞毓

著集死作五噫歌飲酣至海濱持一簡付牧豎曰家人來問以此示之遂赴海死頃之父追至發簡讀之乃囑其弟立後事也父號哭曰兒死誠當但屍不可得如何明日怒濤湧屍上冠履不失瑋字鴻儒郡城失賊絕命詞潛往深塘自沈死日炯字中黃受業劉宗周之門江上師潰赴池死景麟聞紹興破整巾服懷所作文走謁先聖赴泮池死君正城破夜入明倫堂縊死欽堯之琦皆赴水死

張肯堂字載寧松江華亭人天啓五年進士授濬縣知縣弭盜安民大著聲績崇禎七年擢御史明年春賊陷鳳陽條上滅賊五事計慮周悉時不能盡用俄以皇陵震驚疏責輔臣不宜作秦越之視時給事中范淑泰劾大學士王應熊納賄

川巡撫王維章賄帝不問肯堂言淑泰糾應熊行同盜跖而應熊之辨不啻操同曾史是非爚亂祈至尊廷鞫無留疑案滋朝端聚訟應熊憤抵言諸臣不過欲逐臣及維章俾同黨盡據中外要地帝亦不問出按福建數以平寇功受賚還朝言監司營競紛紜意所欲就則保留久任意所欲避則易地借才今歲燕秦明歲閩粵道路往返動經數千程限稽遲多踰數月加一番更移輒加一番擾害今郡守非三年不遷縣令非四年不召何獨於監司而忽之帝是其言十二年十月楊嗣昌出督師肯堂奏言從古戡亂之法初起則解散勢成則剪除未有專任撫者今諸臣以撫自愚一悞再悞至於三四熊文燦已矣輔臣膺新命而出賊必仍用故伎佯搖尾乞

憐而失事諸臣冀掩從前敗局必多方熒惑仍進撫議請特
申一令專務勦除有進招撫說者立寘重典况殲渠散黨明
旨昭然欲取渠魁數十萬衆中豈能兵不血刃使自授其首
哉三面宏開俟張獻忠俘馘後可也帝以偏執臆見責之十
四年四月言流寇墮城破邑屢陷名藩中原形勝地往來縱
橫如入無人之境此督師嗣昌受事前所未有目前大計先
在釋嗣昌之權觀其逡巡二年喪師殆盡小醜視之蔑如矣
上慮譴訶之及則欺飾日深外憤威望之輕則乖張日甚寧
止無功抑且生變嗣昌一日未撤封疆禍一日未已也疏奏
帝不悅而是時嗣昌已死矣十二月復言今討賊不可謂無
人巡撫之外更有撫治總督之上又有督師令各辦一股賊

位號雖殊事權無別楚自報捷豫自報敗甚至南陽失守禍
中親藩督師職掌安在試問今爲督師者將居中而運以發
蹤指示爲功乎抑分賊而辦以焦頭爛額爲事乎今爲秦保
二督者將兼顧提封相爲犄角之勢乎抑遇賊追勦專提出
境之師乎今爲撫者將一稟督師之令進退惟其指揮乎抑
兼視賊勢之急戰守可以擇利乎凡此肯綮一切置不問中
樞冥冥而決諸臣贖贖而任至失地喪師中樞糾督撫以自
解督撫又互相委以謝愆而疆事已不可問矣帝納其言下
所司詳議肯堂所條奏切中事情大率類此十五年請召還
建言譴謫諸臣詞旨懇切帝下所司吏部尙書李日宣都御
史王道直等核上四十三人帝取諸臣去國原疏召輔臣面

裁議乃復給事中陰潤李清劉昌御史周一敬官餘不用肯堂旋擢大理寺丞頃之以右僉都御史巡撫福建福王立遣兵入衛南京破總兵鄭鴻逵擁唐王聿鍵入閩與其兄南安伯芝龍及肯堂勸進遂加太子少保吏部尙書會櫻至言官請令櫻掌吏部乃易肯堂掌都察院肯堂請出募舟師由海道抵江南倡義旅而王由仙霞趨浙東與相聲援乃加少保給勅印便宜從事擢文選郎中朱永佑爲吏部右侍郎福州推官徐孚遠爲兵科給事中從行二人皆肯堂里人也芝龍懷異心陰沮之不成行

順治三年王敗死肯堂飄泊海外六年至舟山魯王用爲東閣大學士八年

大兵乘天霧集螺頭門定西侯張名振奉王航海去屬肯堂城守城中兵六千居民萬餘堅守十餘日城破肯堂衣蟒玉南向坐令四妾一子婦一女孫先死乃從容賦詩自經一時同死者兵部尙書李向中禮部尙書吳鍾巒吏部侍郎朱永佑安洋將軍劉世勛左都督張名揚通政使會稽鄭遵儉兵科給事中鄞縣董志寧兵部郎中江陰朱養時戶部主事福建林瑛蘇州江用楫禮部主事會稽董元兵部主事福建朱萬年長洲顧珍臨山衛李開國工部主事長洲顧中堯中書舍人蘇州蘇兆人工部所正鄞縣戴仲明定西侯參謀順天顧明楫諸生福建林世英錦衣指揮王朝相內官監太監劉朝凡二十一人向中鍾祥人崇禎十三年進士授長興知縣

以才調秀水著廉惠聲福王時歷車駕郎中蘇松兵備副使唐王以爲尙寶卿閩事敗避海濱魯王監國召爲右僉都御史從航海進兵部尙書從至舟山及是破大帥召向中不赴發兵捕之以衰絰見大帥呵之曰聘汝不至捕卽至何也向中從容曰前則辭官今就戮爾鍾巒字巒稚武進人崇禎七年進士授長興知縣時亟徵練餉鍾巒以旱潦緩其稅不中額謫紹興照磨踰年移桂林推官聞京師變流涕曰馬君常必能死節已而信至世奇果死福王立遷禮部主事抵南雄聞南都失轉赴福建痛陳國計魯王起兵以鍾巒爲禮部尙書往來普陀山中

大兵至寧波鍾巒慷慨謂人曰昔仲達死璫禍吾以諸生不得死君常死賊難吾以遠臣不得從死今其時矣乃急渡海入昌國衛之孔廟積薪左廡下抱孔子木主自焚死仲達名應昇鍾巒弟子忤魏忠賢死黨禍者也永佑字爰啓崇禎七年進士授刑部主事改吏部罷歸事唐王後至舟山城破被執願爲僧乃被戮名揚名振弟城破母范以下自焚者數十人朝相聞城失守護王妃陳氏貴嬪張氏義陽王妃杜氏入井用巨石覆之自刎其旁開國母瑛明楫妻皆自盡曾櫻字仲含峽江人萬曆四十四年進士乞假歸師事鄒元標久之授工部主事歷郎中天啓二年稍遷常州知府諸御史巡鹽倉江漕及提學屯田者皆操舉劾權文牒日至櫻牒南京都察院曰他方守令奔命一巡按獨南畿奔命數巡按

請一切戒飭罷鈞訪取贖諸陋習都御史熊明遇為申約束焉櫻持身廉為政愷悌公平不畏強禦屯田御史索屬吏應劾者姓名櫻不應御史以危言恐之櫻荅曰僚屬已盡無可糾止知府無狀因自署下考杜門待罪撫按亟慰留乃起視事織造中官李實劾罷巡撫周起元迫知府行屬禮櫻獨如故實怒移檄以爾汝侮之櫻亦報以爾汝卒不屈無錫高攀龍江陰繆昌期李應昇被逮櫻助昌期應昇貲而經紀攀龍死後事出其子及僮僕於獄為文祭之宜與毛士龍坐忤魏忠賢遣戍櫻諷士龍逃去上官捕其家人賴櫻以免武進孫慎行忤忠賢當戍櫻緩其行忠賢敗事遂解七年遷浙江右參政用士民請詔以新秩留任崇禎元年以右參政分守漳

南九蓮山賊犯上杭櫻募壯士擊退之夜搗其巢殲殆盡士民為櫻建祠母憂歸服闋起故官分守興泉二郡進按察司分巡福寧先是紅夷寇興泉櫻請於巡撫鄒維璉用副總兵鄭芝龍為軍鋒果奏捷及劉香寇廣東總督熊文燦欲得芝龍為援維璉等以香與芝龍有舊疑不遣櫻以百口保芝龍遂討滅香芝龍感櫻次骨十年冬東廠獲一男子言為櫻行賄謀遷浙江按察使詞連吏部主事林中鳳來方煒帝怒下兩人獄命撫按械櫻赴京御史葉初春先為櫻屬吏知其廉於他疏微白之有詔詰問因具言櫻賢然不知賄所從至詔至閩巡撫沈猶龍巡按張肯堂閱廠檄有奸人黃四臣名芝龍前白曰四臣我所遣我感櫻恩恐遷去令從都下訊之

四臣乃妄言致有此事猶龍肯堂以入告力訟櫻冤芝龍亦具疏請罪士民以櫻貧爲矜金辦裝者老數千人隨至闕下擊登聞鼓訟冤帝命母入獄俟命京邸削芝龍都督銜而令櫻以故官巡視海道未行楊嗣昌以衡永多寇奏改櫻湖廣按察使兼右參政分守湖南給以勅故事守道無勅帝特賜之時賊已殘十餘州縣而永州知府推官咸不任職櫻薦蘇州同知晏日曙歸德推官萬元吉才兩人方坐事罷官以櫻言命日曙以同知掌知府事元吉以檢校掌推官事櫻乃調芝龍勦賊賊多降一方遂安遷山東右布政使分守登萊十四年春擢右副都御史代徐人龍巡撫其地明年遷南京工部右侍郎乞假歸山東初被兵巡撫王永吉所部濟兗東三

府州縣盡失匿不以聞及兵退以恢復報而櫻所部青登萊三府失州縣無幾盡以實奏及論罪永吉反擢兵部侍郎總督薊遼而櫻奪官逮治下刑部獄不十日而京師陷賊盡釋諸囚櫻乃微服遁還自詣南京刑部時福王已立法司當以贖徒唐王稱號於福州鄭芝龍專柄薦櫻起工部尙書兼東閣大學士無何令掌吏部而移吏部張肯堂於都察院櫻持法不撓數有所執爭薦揭重熙傅鼎銓等皆擢用櫻尋進太子太保吏部尙書文淵閣王駐延平令櫻留守福州

大兵破福州櫻挈家避海外中左衛越五年其地被兵遂自縊死重熙字祝萬撫州臨川人崇禎九年順天鄉試及明年會試重熙皆以五經中式時稱異才初授福寧知州福王時

擢吏部考功主事外艱歸

順治二年六月南昌破撫州亦破與同里曾亨應先後舉兵唐王命以故官聯絡建昌兵一戰而北吏部主事王兆熊劾之用大學士曾櫻薦令以考功員外郎兼兵科給事中從大學士傅冠辦湖東兵事瀘溪告警冠不能救重熙劾解冠任兵事遂皆委重熙江西巡撫劉廣胤戰敗被執復用櫻薦擢右僉都御史代廣胤攻撫州不克而退俄聞汀州失解兵入山五年永明王拜重熙兵部尙書兼右副都御史總督江西兵召募萬餘人薄邵武敗還金聲桓左良玉將也已降於大清復乘間爲亂據南昌

大兵攻討之聲桓死諸軍盡散獨張自盛衆數萬走閩重熙入其軍約廣信曹大鎬並進自盛掠邵武戰敗被執重熙走依大鎬九年五月重熙率數十人赴大鎬於百丈礮適大鎬還軍鉛山惟空營在衆就營炊食

大兵偵得之率衆至射重熙中項執至建寧下之獄重熙覓死具不得日整衣冠拜呼高皇帝祈死冬十一月昂首受刃顏色不改鼎銓字維衡重熙同邑人崇禎十三年進士除翰林檢討充永王講讀官疏救劉宗周幾獲罪李自成陷京師鼎銓出謁賊敗南還唐王時曾櫻薦鼎銓王以其降賊命予知府銜赴贛州軍自効尋復其故官贛州破退隱山中已聞金聲桓叛


大清鼎銓乃舉兵以應永明王屢擢爲兵部右侍郎兼翰林

侍讀學士聲桓滅鼎銓往來自盛大鎬軍

順治八年至廣信張村爲守將所執繫南昌獄論之降不從
令作書招重熙亦不從鼎銓自降流賊爲鄉人非笑嘗欲求
一死所至是不少挫八月朔從容就刑鄉人更賢鼎銓已重
熙大鎬相繼敗而都昌督師余應桂亦以是歲亾江右兵遂
盡

陳潛夫字元倩錢塘人家貧落魄好大言以駭俗崇禎九年
舉於鄉益廣交游爲豪舉好臧否人里中人惡之友人陸培
兄弟爲文逐潛夫潛夫乃避居華亭十六年冬授開封推官
大河南五郡盡爲賊據開封被河灌城虛無人長吏皆寄居
封丘有勸潛夫弗往者不聽馳之封丘會叛將陳永福率賊

兵出山西其子德爲巡撫秦所式部將縛巡按御史蘇京去
潛夫募民兵千請於所式及總兵卜從善許定國令共勦皆
不肯行潛夫乃以十七年正月奉周王渡河居杞縣檄召旁
近長吏設高皇帝位歃血誓固守賊所設僞巡撫梁啓隆居
開封故歸德推官桑開第降賊爲督賦他僞官散布郡邑間
甚衆而開封東西諸土寨剽劫公行相攻殺無已潛夫轉側
杞陳留間朝夕不自保聞西平寨副將劉洪起勇而好義屢
殺賊有功躬往說之五月五日方誓師而都城失守報至乃
慟哭令其下縞素洪起兵萬號五萬潛夫兵三千俘杞僞官
啓隆聞風遁去遂渡河而北大破賊將陳德於柳園時李自
成已敗走山西而南陽賊乘間犯西平洪起引還潛夫亦隨



而南福王立於南京潛夫傳露布至朝中大喜卽擢監軍御史巡按河南潛夫乃入朝言中興在進取王業不偏安山東河南地尺寸不可棄豪杰結寨自固者引領待官軍誠分命藩鎮以一軍出潁壽一軍出淮徐則衆心競奮爭爲我用更頒爵賞鼓舞計遠近畫城堡俾自守而我督撫將帥屯銳師要害以策應之寬則耕屯爲食急則披甲乘墉一方有警前後救援長河不足守也汴梁一路臣聯絡素定旬日可集十餘萬人誠稍給糗糧容臣自將臣當荷戈先驅諸藩鎮爲後勁河南五郡可盡復五郡旣復畫河爲固南連荆楚西控秦關北臨趙衛上之則恢復可望下之則江淮永安此今日至計也兩淮之上何事多兵督撫紛紜竝爲虛設若不思外拒

專事退守舉土地甲兵之衆致之他人臣恐江淮亦未可保也當是時開封汝寧間列寨百數洪起最大南陽列寨數十蕭應訓最大洛陽列寨亦數十李際遇最大諸帥中獨洪起欲効忠潛夫請予挂印爲將軍馬士英不聽而用其姻婭越其傑巡撫河南潛夫自九月入覲便道省親甫五日卽馳赴河上所建白皆不用諸鎮兵無至者其傑老憊不知兵兵部尙書張縉彥總督河南山東軍務止提空名不能馭諸將其冬應訓復南陽及泌陽舞陽桐栢遣子三傑獻捷潛夫授告身飲之酒鼓吹旌旂前導出三傑喜過望往謁其傑其傑覲其萌故爲尊嚴厲辭詰責詆爲賊三傑泣而出萌異心潛夫過諸寨皆饒吹迎送其傑問過之諸寨皆閉門不出其傑恚

潛潛夫於士英士英怒冬盡召潛夫還以凌駟代潛夫亦遭外艱歸明年三月給事中林有本疏劾御史彭遇颯并及潛夫士英以遇颯已私人置不問獨令議潛夫罪先是有童氏者自言福王繼妃廣昌伯劉良佐具禮送之潛夫至壽州見車馬騶從傳呼皇后來亦稱臣朝謁及童氏入都王以爲假冒下之獄遂責潛夫私謁妖婦逮下法司治之未幾南都不守潛夫得脫歸聞魯王監國紹興渡江往謁命復故官加太僕少卿監軍乃自募三百人列營江上尋進大理寺少卿兼御史如故

順治三年五月晦江上師盡潰潛夫走至山陰化龍橋作絕命詞偕妻妾二孟氏同赴水死年三十七始爲文逐潛夫者陸培舉進士爲行人奉使事竣歸省南都旣覆謀結壯士保鄉土俄聞潞王降索酒飲將自裁其妻晝夜守培乃給妻他往拒戶自經妻兄子破壁救之甦培大恨賦絕命詩二章上書其母以繩授二僕曰我爲烈士若輩宜相成坐方牀從容就縊死年二十九培字鯤庭父運昌崇禎七年進士授永豐知縣調吉水以治績聞培少負俊才有文名行誼修謹客華亭嘗却奔女於室

林汝翥字大茂福清人舉於鄉授沛縣知縣天啓二年戰却徐鴻儒兵緝妖人王普光黨有功特擢御史四年六月巡視京城民曹大妻與人奴角口服毒死火者曹進傳國與率衆大掠奴主家用大錐錐其主刑官不敢問汝翥捕得進進懼

劾請受杖遂杖之五十國典邀於道罵不已汝翥收繫之亦請受杖復杖之魏忠賢大怒立傳旨廷杖汝翥先數日羣奄毆殺萬燦汝翥大懼逸至遵化巡撫鄧漢為代題都御史孫瑋御史潘雲翼等交章論救不聽卒杖之削籍歸崇禎初起官右參議分守溫處道不赴久之起瓊州道坐奸民煽亂貶秩歸福王時起雲南僉事已而解職魯王次長垣召為兵部右侍郎與員外郎林奎攻福寧戰敗被執諭降不從繫之吞金屑而死奎字子野汝翥同邑人為諸生講求濟世要務舉崇禎十六年進士授海寧知縣邑有妖人以劔術惑眾聚千人盜捕殺之南都覆杭州亦不守卒乘機乞餉環署大謀奎罪為首者而如其請以城孤不能存引去唐王以為御史改

文選員外郎募兵福寧聞王被殺大慟走匿山中及魯王航海至長垣福清鄉兵請奎為主與汝翥共攻城歿於陣王瑞梅字聖木永嘉人天啓五年進士授蘇州推官兼理兌運軍民交兌恆相軋啓彙瑞梅調劑得宜歲省浮費三萬金上官為勒石著令貴人弟好法執問如律其人中之當塗將議調遂歸崇禎七年起河間推官遷工部主事調兵部轉職方員外郎擢湖廣兵備僉事在襄陽十一年春張獻忠據穀城乞撫總理熊文燦許之瑞梅以為非計謀於巡按林銘球總兵官左良玉將俟其至執之文燦固以為不可瑞梅言賊以計愚我我不可為所愚今良玉及諸將賈一選周仕鳳之兵俱在近境誠合而擊之何患不捷文燦怒責以撓撫局瑞

梅曰賊未剗而遽撫彼將無所懼惟示以必勦之勢乃心折不敢貳非相撓實相成也文燦不從瑞梅乃列上從征歸農解散三策文燦亦不用瑞梅自爲檄諭獻忠獻忠恃文燦庇已不聽明年獻忠叛瑞梅先已丁憂歸獻忠留書於壁言已之叛總理使然具列上官姓名及取賄歲月而題其末曰不納我金者王兵備一人耳由是瑞梅名大著服闋未及用而都城陷福王時召爲太僕少卿極陳有司虐民之狀旋告歸唐王召赴福建仍故官未幾復歸及闔地盡失溫州亦不守避之山中有欲薦令出者乃拜辭家廟從容入室自經死余煌字武貞會稽人天啓五年由殿試第一人授翰林修撰與修三朝要典崇禎時以內艱歸服闋起左中允歷左諭德

右庶子充經筵講官給事中韓源劾禮部侍郎吳士元庶子華琪芳及煌皆與修要典宜斥帝置不問煌疏辨帝復溫旨慰諭之戶部尙書程國祥請借京城房租煌爭不可乞假歸遂丁外艱服除久不起魯王監國紹興起禮部右侍郎再起戶部尙書皆不就明年以武將橫甚拜煌兵部尙書始受命時諸臣競營高爵請乞無厭煌上言今國勢愈危朝政愈紛尺土未復戰守無資諸臣請祭則當思先帝蒸嘗未備請葬則當思先帝山林未營請封則當思先帝宗廟未享請蔭則當思先帝子孫未保請諡則當思先帝光烈未昭時以爲名言

大清兵過江王航海遁六月二日煌赴水舟人拯起之居二

日復投深處乃死

沈廷揚字李明崇明人好談經濟崇禎中由國子生爲內閣中書舍人十二年冬帝以山東多警運道時梗議復海運廷揚生海濱習水道上疏極言其便且輯海運書五卷以呈帝喜卽命造海舟試之廷揚乘二舟由淮安出海抵天津僅半月帝大喜卽加戶部郎中往登州與巡撫徐人龍計海運事寧遠軍餉率用天津船自登州候東南風轉粟至天津又候西南風轉至寧遠廷揚請從登州直達寧遠帝用其議省費多十五年命再赴淮安督海運事竣加光祿少卿仍領其事及京師陷福王立命廷揚以海舟防江尋命兼理餉務餽江北諸軍南京失守走還鄉里後航海至舟山依黃斌卿唐王

在福建授兵部右侍郎總督水師魯王授官亦如之魯王航海之明年廷揚督舟師北上抵福山次鹿苑夜分颶風大作舟膠於沙爲

大清兵所執諭之降不從被戮

朱繼祚莆田人萬曆四十七年進士授庶吉士進編修天啓中與修三朝要典尋罷去崇禎初復官累遷禮部右侍郎充實錄副總裁給事中葛樞言繼祚嘗纂修要典得罪清議不可總裁國史不聽繼祚旋謝病去起南京禮部尙書又以人言罷去福王時起故官未赴南都失唐王召爲東閣大學士從至汀州王被擒繼祚奔還其鄉魯王監國繼祚舉兵應王攻取興化城旣而

大兵至城復破繼祚及參政湯芬給事中林眉知縣都廷諫
竝死之芬字方侯嘉善人崇禎十六年進士福王時爲史可
法監紀推官唐王以爲御史尋以監司分守興泉道城破緋
衣坐堂上被殺眉字小眉繼祚同邑人由進士爲吳江知縣
蘇州失歸仕唐王至是自縊死廷諫杭州人莆田知縣王自
監國二年正月至長垣逮次年正月連克建寧邵武興化三
府福寧一州漳浦海澄連江長樂等二十七縣軍聲頗振及
是得者復失海澄復五日卽失知縣洪有文死之永福失邑
人給事鄒正畿御史林逢經俱投水死長樂失邑人御史
王恩及牟壽死妻李氏同死建寧失守將王祈巷戰不勝自
焚死

